



醫 日  
藥 用

13  
1492  
7





門 4加3  
號 492  
卷 7-7



攷事新書卷之十四

日用門 下

收筆法

收筆東坡以黃連蒿荳煎湯調輕粉蘸筆頭候乾收  
之不蛀○山谷以蜀椒黃蘗煎湯磨松煤染筆咸  
之不蛀○養筆以硫黃酒舒其毫○洗筆法以器  
盛熱湯浸一炊久輕輕擺洗次却用冷水滌之若  
有油膩則以皂角洗之甚佳

造墨法

李廷珪造墨法清麻油十斤內先取三斤以蘇木一

攷事新書

卷十四

一





兩半黃連二兩半杏仁二兩搥碎同煎候油變色  
放溫濾去滓傾入餘油中攪勻掘地安盞深淺令  
與盞平滿添油注燈以瓦盆約面濶八九寸底深  
三寸許者覆之仍用方寸瓦片搭起三面不可太  
高又不可太低每一炊久即掃一度只可作十盞  
盞多則掃不徹每煙四兩半用黃連半兩蘇才四  
兩各搥碎水二盞同煎五六沸候色變用熟絹濾  
去滓別用沉香一錢半煎留水四兩許再濾次用  
腦半錢麝一錢輕粉一錢半以藥汁半合研化先  
將藥汁入乾膠一兩一錢五分同熬不住手攪令

溶後入腦麝汁攪勻乘熱傾入煙內就無風處速  
攪和次就案上團揉候光可照人方印作錠子頓  
無風處窸五六日候乾取出淨刷收貯○造膠法  
黃牛皮水浸透拔去毛仰攤在平板上取生黃土  
勻撒皮上良久以小刀剗去筋膜換水頻洗斫碎  
入無油膩鍋內水煎成膠傾出薄攤竹隔子上風  
乾

韋仲將合墨法以好純煙搗訖以細絹篩於缸中煙  
一斤先以好膠五兩浸梘皮梘江南樊雞木也汁  
中可下雞子白去黃五枚亦以真朱紅一兩麝香



一兩皆別治細篩都合調下鐵臼中寧剛不宜澤  
搗三萬杵多多益善合墨不得過二月九月溫則  
敗臭寒則難乾漚溶見風日破碎仲將之墨一點  
如漆

今俗造墨法純煙十斤阿膠四斤水十斤以水九斤  
浸膠盛銅盆置火上待融以煙和訖以餘一斤水  
洗盆盛別器搗時用水揮洒搗期萬杵又以不染  
掌爲度作丁時從薄印出於幽室中平板上布濕  
灰一寸許令平次布紙紙上攤墨墨上布紙再布  
濕灰一寸許經三夜或一夜後每丁割四方令正

又布乾灰一寸許於板上如前布紙於墨上下又  
布乾灰一寸許經三夜或一夜出攤於幽室中平  
板上數日翻覆以堅爲度

造松煤墨法多取松煙入缶煮熟待乾製造阿膠及  
水斤兩如上造法作丁時大小厚薄隨宜但必以  
萬杵爲度無異真墨

藏墨法用熟艾和收遇梅月藏石灰中不蒸○養墨  
以豹皮囊貴於遠濕也○肥皂浸水磨墨可於油  
紙上寫字

搥紙法



乾紙十張外洒濕一張沓上如此重疊沓起以百張  
爲一塚放平正案上又以平面板壓在上以大石  
壓之經一伏時上下乾濕皆勻於石上勻搥二三  
百下皆着實於百張內將五十張晒乾却與濕者  
五十張乾濕相間沓了再勻搥二三百下依上晒  
乾一半又乾濕相間沓了如此三四次直至無一  
張沾粘爲度再以石碾三四次倒下搥勻直至光  
滑如油紙○養紙以芙蓉粉借其色也○白香山  
常用葵牋綠色而澤入墨覺有精采其法採帶露  
蜀葵葉研汁用布揩抹紙上俟少乾用石壓之

### 洗硯法

凡硯須日滌之過二三日墨色差減縱未能滌亦須  
易水春夏蒸濕之時墨久留其間則膠力滯而不  
可用尤要頻頻滌去○洗硯不得使熱湯亦不得  
用氈片故紙常接皂角水洗之爲得○洗硯用蓮  
蓬殼蓮房或  
枯炭或半夏切平擦之大去滯墨

### 竹硯滴法

銅性猛烈貯水久則有毒多脆筆毫磁者本好而莫  
若竹取節長二寸許以小竹挿作觜甚是標格清  
致誠野人之物也



書畫諸法

書絹帛法用生薑磨墨則不陰用絹擦絹上則寫字

易工

藏書畫法凡書畫當於梅雨前晒令極燥書則頓厨櫃畫則捲入匣厚以紙糊櫃匣小縫令不通風過梅月方開則不蒸蓋蒸氣自外而入故也古人藏書多用芸香辟蠹麝香亦可一法用樟腦亦佳

洗書畫法將書畫鋪平案上取水勻噴濕復令四面平穩用馬尾刷子羅寒水石末如一錢厚再噴濕又羅皂莢灰如前便半時辰以溫水衝起如有污

損取燈草揩卽淨潔如是墨污須用一伏時方以溫水衝起墨跡卽去○書畫蒸濕變滷者用冬瓜或銀杏蒜洗之○墨污書絹用燈草蘸水洗卽去  
補書畫法先以盆貯水緩傾好麪於水上任其自沉不可攪攪則有塊置盆淨室中夏七八日冬半月候極臭敗徐徐去水別用新水及胡椒煎水調攪令勻煮極熟稍硬取出作大團入石灰湯浸之臨用取出量稀稠添熟湯爛研以布絞濾每一碗入白礬末半兩黃蠟二錢半和勻用之不用礬則有蟲蛀蒸傷之患凡補碑文及綾帛須用硬糊卽不



五事新書  
失光若潤透則失光矣○麩一斤浸水夏五日冬十日待臭漉出白芨五錢白礬三分水煎去滓和麩打成濃糊入桐油黃蠟芸香各三錢重就鍋內打作一團別換水煮令熟去水傾置器內日換水浸臨用以湯調開

### 造燈燭法

製造書燈法以薄木板作之如木櫃狀墨漆寬五六寸只可容一燈盞高八寸頂有圓竅徑三寸前有手窻掛起則燈光直射於書上其明倍於常燈○香油一斤入桐油三兩耐點又辟鼠耗以鹽小許

置盞中亦可省油以生薑擦盞邊不生暈○以蘇木煎燈心曬乾炷燈則無燼○立春前一日或臘前一日以水浸燈心小時曬乾收之夏月點燈則蚊蚋不近○挑燈杖二月初二日或清明日五更一云日未出時不語採薺菜梗陰乾作挑燈杖諸蟲永不

### 入燈盞內

耐點蠟燭法黃蠟松脂槐花各一斤浮石水泡石也四兩同一處溶用燈心布澆一晝夜僅點一寸○風前燈乾漆搗海金沙硝石硫黃各一兩黑豆末瀝青黃蠟各一兩先溶瀝青黃蠟成汁後入前件滾和



以舊布火上攤作條燃風前不滅一云用蜀葵楷風雨中亦不滅  
○萬里燭黃花地丁及皂角花松花槐花各二錢  
蜜一斤同煎數沸瀉出入白芨二錢候赤暈時退  
火已凝結矣

引光奴削松明爲小片薄如紙鎔硫黃塗其銳夜有  
急用是發火卽燃或用樺皮燒太急易滅不如松  
明之耐久也

### 留宿火法

炭十斤鐵屎十斤合搗成末生芙蓉葉三斤再搗入  
糯米膠和捏作獸炭晒乾燒紅三日不滅○好胡

桃一箇燒半燃灰埋三五日不燼○造香炭以石

灰無則木炭亦可同生葵葉搗和爲餅曬乾焚香雖冷濕

地火亦不滅

### 造爐香法

爐香山居不可缺取老松栢根枝葉實搗治之研楓  
肪和之每焚一丸亦足取清苦

### 造枕褥法

石枕無如磁石如無大塊以碎者琢成枕面下以木  
鑲最能明眼明眼者無如此可老而不昏○菊花  
枕秋採甘菊花貯以紅布囊作枕用能清頭目去



邪穢

神枕五月五日七月七日取山林柏以為枕長一尺  
二寸高四寸空中容一斗二升以柏心赤者為蓋  
厚二分鑽蓋上為三行行四十孔凡一百二十孔  
令容粟米大用藥芎藭當歸白芷辛夷杜蘅白朮  
藁本木蘭川椒桂皮乾薑防風人蔘苦蕒白茯苓  
荆實肉蓯蓉飛廉柏實薏苡欵冬花白薇秦椒靡  
蕪凡二十四物以應二十四氣加毒者八物以應  
八風烏頭附子藜蘆皂莢茵草礬石半夏細辛凡  
三十二物各一兩皆剉以毒藥上安之蒲枕中用

布囊以衣枕復以韋囊重包之臨卧時脫去之蓋  
防藥氣外泄也枕之百日面有光澤一年體中諸  
疾皆愈而滿身盡香四年白髮變黑齒落復生耳  
目聰明神方驗秘不傳非其人也

蒲花褥採蒲花如柳絮者熟一云採蒲略蒸晒取花貯以方

青囊作坐褥或卧褥甚温煖木綿不及也

拄杖法

拄杖法以班竹為上竹欲老瘦而堅硬斑欲微赤而  
點疎○點斑竹法礪砂五錢斑猫一錢石炭一錢  
用醋調點竹上火煨之成色



掛琴法

琴不宜着壁有土氣惟板壁上爲妙

磨劍法

磨劍不得用水及麤石當以香油就膩石慢慢磨去  
鏽却用打鐵爐邊打落鐵蛾兒三兩入木炭一兩  
水銀一錢同爲末糝劍上以布片蘸油耐久磨擦  
其光如鏡綿子拭淨以酥塗掛起永不鏽○松菜  
子作油塗之○鼯鼠皮毛頻拭鐵物則良○以木  
賊擦之鏽自落

軟玉石法

蟾蜍肪塗玉則刻之如蠟但不可多得取肥者煎膏  
以塗玉亦軟滑易截古玉器有奇特雕琢非人功  
者多是昆吾刀及蟾蜍肪所刻也○地榆根燒灰  
能爛石蟾蜍尿取以塗石亦能爛

粘瓦石法

榆白皮濕搗如糊用粘瓦石極有力○白膠香真者  
一兩黃蠟瀝青各一錢香油一滴尋所壞石同色  
者搗爲末和作膏烘熱粘之此乃補石神膠也如  
粘山石斷者則去石末加蛤粉調乾粘之○雞子  
白和白礬末粘磁器甚好



奴婢不逃自還法

張華物類相感志曰以篋帶麻作線左緊之縫奴婢衣脊一尺六寸卽無逃走之心○張華志曰取逃人衣裳井中垂運之則逃人自還本草曰取逃人髮於緯車上却轉之則迷亂不知所適云今俗以紙書逃人姓名貼梁上亦此類也

辟寒法

取天門冬白茯苓等分爲末酒服二錢日再則大寒時單衣汗出○清一匙吞下最能禦寒

辟墓中罔象蝮法

灸穀子曰罔象好食亡人肝腦而畏虎與栢故墓上樹栢墓前立虎又小說曰地中有物名蝮食死人腦以栢穿其首則死故墓前樹栢云

夜行辟鬼火法

說郛曰入田野中見鬼火以鞍兩鐙相叩作聲鬼火卽滅

入山辟妖魅法

入山則山精老魅或作人形當懸明鏡九寸於背後其形在鏡中則不能變消亡退步

辟虎狼法



入山林誦儀康不怕虎狼○夜行勿歌唱大呼虎豹  
夜聽人唱聲追害之

避亂止兒哭法

用綿作一小毬略使滿口而不致閉其氣以甘草煎  
湯或甜物漬之臨時縛置兒口中使嚙其味兒口  
有物實之自不能作聲而綿軟不傷兒口盖不幸  
而遇禍難啼聲不止恐爲賊所聞棄之道傍哀哉  
用此法活人甚衆不可不知

避亂解煙熏法

有人避亂石窟賊以煙火熏之迷悶欲死得羅菴嚼

汁下咽而甦羅菴子水研取服亦解

避亂救飢法

辟亂大道丸黑豆一升去皮貫衆甘草各一兩茯苓  
蒼朮砂仁各五錢剉碎用水五盞同豆慢火熬煎  
直至水盡揀去藥取豆搗如泥作芡實大磁器密  
封每嚼一丸則恣食苗葉終日可飽雖異草殊木  
素所不識亦無毒甘甜與進飯同○又一方黑豆  
一升貫衆一斤同煮○嚙津服水法飢餓欲死便  
閉口以舌攪上下齒取津液嚙之一日得三百六  
十嚙便佳漸習乃可至千自然不飢三五日疲極



過此便漸強若有水處卒無器便以左手掬水呪  
曰丞掾吏之賜真乏糧正赤黃行無過城下諸醫  
以自防呪畢三叩齒右手指五叩左手如此三遍  
便飲之有杯噐貯水尤佳如法日服三升便不飢  
○服六天氣法春食朝霞日欲出時向東氣也夏  
食正陽南方日中氣也秋食飛泉日欲沒時向西  
氣也冬食沆瀣北方夜半氣也并天玄地黃之氣  
是爲六氣皆令人不飢延年無疾一云平明爲朝  
霞日中爲正陽日入爲飛泉夜半爲沆瀣并天玄  
地黃爲六氣昔有人墮穴中其中有蛇每日作此

氣服之其人依蛇時節飢時便服日日如之久漸  
有驗似能輕氣啓蟄之後人與蛇一時躍出

### 辟蟲法

辟蛇法養鴉能辟蛇○燒殺羊角蛇卽遠去○四壁  
柱上用倒流水研墨書龍字貼之○多用小片磚  
瓦寫儀方二字置四處蛇見自畏退○端午日午  
時用朱砂寫茶字貼之蛇蝎不敢近○清明日取  
戌方土煎狗尾作泥塞戶內孔穴則蛇鼠諸蟲永  
不敢入○凡行山路帶雄黃在身或研水塗腳心  
蛇自遠避不敢近○凡入山林默念儀方不見蛇



蟲

燕巢引蛇書戊字貼於燕至處則不來○用白紙朱書鳳凰二字貼巢上即去

辟鼠法用木刻貓兒一箇以赤鼠屎調彩畫之鼠見

自走○用黑犬血和蟹燒之諸鼠悉去○大雄鼠

一箇割去其勢放之滿屋自咬鼠死似貓○荷花

梗塞鼠穴鼠自去○每月辰日四要日正塞鼠穴

則自無鼠○遇寅日以物塞鼠穴鼠自斷○逐月

庚寅日壬辰日并滿日及正月上辰日塞鼠穴○

三月庚午日斬鼠尾取血塗梁可永辟○牛蒡子

設似草麻設有刺尖有倒鈎鼠甚畏之着其體粘住即死故一名鼠粘子置於鼠穴可逐鼠

辟蚊蟲法書風字間字於窻間壁下則無○用浮萍

羌活爲末焚之蚊蟲自死○用驚殼夜明砂爲末

燒之○夜明砂燒煙可辟蚊子○除夜五更使一

人堂中向堂扇一人問云扇甚的答云扇蚊子則

無蚊子○端午日五更依前法扇問答尤驗○端

午日取大蝦蟆一箇用好墨一塊入於口中紅線

縛住取正午時方掘一穴深五尺埋之至第二日

午時取蝦蟆口中墨於壁上畫葫蘆一箇用淨水



噴三日蚊子盡入葫蘆內不可打殺欲其去時用  
扇扇去取墨蝦蟆活則驗○端午日用麻線一條  
圍床周匝以蝙蝠血塗遍繫床四面絕蚊蚋○端  
午日取浮萍陰乾燒煙蚊子自去一云去蚊蚋及蜈蚣○  
鰻鱧魚鮓長乾者燒室中蚊化為水○端午日用  
臘水洗屋下無蚊蠅○用土閉日泥壁用水閉日  
掛帳則無蚊蠅

辟蚤虱法用菖蒲蔥浮萍各一斤為末每用半盞許  
撒於席上次日皆自死治狗蚤同○乾菖蒲細切寘席  
下又以麝香少許着在薦上皆可去之○用臘雪

水日洒薦席能去蚤虱○凡人洗濯衣服於粉糴  
內入水銀少許研勻糴衣其後虱永不生○帶砒  
礪辟蚤虱○辟狗蚤法用菖蒲末糝席上極驗○  
用茯苓末糝茵席下○用好木瓜片鋪床下○清  
明日用熨斗內着火炒棗子於床下帳內上下令  
煙出令一人問炒甚的答云炒狗蚤七問七答則  
狗蚤不生○端午日用熨斗燒一棗置床下辟狗  
蚤以上諸法亦治壁虱○三月三日收薺菜花鋪床席下去  
蚤○辟壁虱法用紙書欠我青州木瓜錢七字貼  
於床脚上忽然不見一云張三賢買了木瓜不還



錢一去三十年寫此貼床脚上亦驗○用白馬蹄  
於床下焚燒壁虱盡化為血○用麝香殼三箇為  
末置席下即去○用粹蓼晒乾鋪席下即除○萍  
燒煙熏之即去又辟蜈蚣○辟蟻虱法用菖蒲神  
麪白礬各半兩硝石一分黑錫一兩銚內鎔錫入  
礬硝研成粉入菖蒲麪末以水同煮綿帶子不拘  
多少一炊久候乾每條以水銀一銖於手內唾調  
如泥搓搽帶上用繫腰及頭衣服上永無蟻虱○  
人多虱者將及冬用水銀二三錢臘茶末一錢於  
掌內以津唾調開將綿作繩接勻在上以絹作帶

裏之繫於腰間○用百部秦艽各六兩各搗為末

燒煙放衣熏籠上熏之虱自盡落

若用二味煮湯洗衣尤妙○

辟頭虱法用藜蘆為末糝髮申經宿虱皆自落

藜蘆

百部同搗為末糝髮內搽搽

○用輕粉少許糝頭止一三日虱

皆盡矣

辟蠅法端午日午時寫白字倒貼於柱上四處則無  
蠅○用臘雪水洒几櫟上蠅自去○臘日用瓦器  
盛猪肪脂四五兩緊封瓶口堂上房中厨內各懸  
一瓶當夏雖有蠅十去八九○臘月八日懸猪脂  
於廁上一家無蠅○元日平朝用鹽豉吞七粒終



歲不於食中誤喫蠅子

辟厨間諸蟲法三月初二日雞鳴時以隔宿冷炊湯澆洗甌口及飯甌及一應厨物永無百蟲游走爲害○三月三日收薺菜花鋪竈上去蟲蟻○辟井瓮蟲法清明前二日夜雞鳴炊黍米熟取釜中湯遍洗井口甕邊地則無馬蝗百蟲不近井瓮甚驗○烏賊骨投井中蟲盡死

辟諸物被蛀法用莽草燒煙熏之則蛀蟲皆盡○七月收角蒿置毡褥書籍中辟蛀蟲○鰻鱧魚燒熏檀中斷蛀蟲置骨箱中斷白魚兔諸蟲咬衣服燒

熏竹木辟蛀蟲○芸薹置書中無蠹患○竹器生蛀用生桐油點蛀處則止○辟衣帛蟲蛀法端午日取蒿荳葉置於厨橫中則蛀蟲不生○辟皮物蟲蛀法七月七日晒曝革裘無蟲○以艾葉捲於皮內放在甕中泥封甕口或用花椒在內捲收之亦可○毛衣用無油漆板匣收貯紙糊板縫不通風則不蛀

附雜忌

擇病忌日壬寅壬午連庚午甲寅乙卯巳卯妨神仙留下此六日擇人疾病替人亡

酉陽雜俎曰形不欲照水照井及浴盆中所謂行不履影亦此意歟又曰俗諺五月上屋言五月人蛻



上屋見影魂當去○山居四要曰凡卧歌詠大不祥世言夜卧喜歌者多天盖以此也○漢和帝時初伏令閉盡日註伏日萬鬼行故盡日閉門不干他事程曉伏日詩平生三伏時道路無行車○說郛曰賣宅之財買奴婢及生物并不利於人賣驢馬之財不聘婦令家耗不安○每月初六十六二十六日勿登厠廁神守厠日也

鴿鳴子方大吉丑方富貴寅方酒食卯方財物辰方疾病巳方口舌午方職位未方死亡申方離別酉方盜賊戌方哭泣○非時鷄鳴月德方水盛庚赤豆交合鷄鳴庚及家內敬之○狗探土刺狗耳埋其處又太菜三七介埋成地又蟹九介埋庭中

攷事新書卷之十四

攷事新書卷之十五

醫藥門

忌銅鐵藥

玄參犯銅鐵餌之噎人喉喪人目○地黃犯銅鐵令人腎消髮白○何首烏忌銅鐵犯鐵則必患三消○柴胡沒石子并忌銅鐵宜用竹刀○肉豆寇勿令犯鐵○桑白皮忌鐵及鉛犯鐵則患三消○桑枝木瓜茜根并忌鐵鉛宜用銅刀○菖蒲犯鐵令人吐逆宜用銅刀竹刀○香附切忌犯鐵宜於石臼中搗○杜冲忌鐵宜新瓦上乾木臼中搗○天



門冬麥門冬知母犯鐵則患三消○黃栢牧丹皮益母草忍冬草桑寄生石榴皮葉根草龍膽桃奴地骨皮猪苓骨碎補白馬莖并忌鐵

諸藥食忌

服藥通忌生菜○餌藥之人食鹿肉必不得藥力蓋鹿恒食解毒草能制諸藥耳○服諸藥不可多飲醋○服藥不可多食生胡荽及蒜果雞犬肉肥羹魚膾等物○凡使一切角大忌鹽○有茯苓勿食酸醋物一云忌米醋蓋服茯苓而喫醋則前功俱廢○有細辛勿食生菜○有鱉甲勿食莧菜○有

常山勿食生蔥菘菜○有桂勿食生蔥○蜜忌生蔥蒿苳○蓮花忌地黃及蒜○麝香忌大蒜○有牧丹勿食生胡荽又曰牧丹皮忌蒜○有地黃勿食蔥蒜蘿菹○有何首烏勿食蘿菹無鱗魚服地黃何首烏而食蘿菹則能耗諸血髭髮早白○有木勿食大蒜胡荽桃李雀蛤青魚酢食桃或瓜○有甘草勿食菘菜海藻猪肉一云服甘草而食菘則病不除○有黃連桔梗勿食猪肉服黃連至三年則不得食猪肉一生黃連又忌冷水○胡黃連忌猪肉食則漏精○有蒼耳忌食猪肉米泔○有



巴豆勿食蘆筍羹野猪肉及醬豉冷水○有牛膝  
勿食牛肉○有商陸勿食犬肉○有藜蘆勿食狸  
肉○破故紙忌羊肉○有半夏菖蒲勿食羊肉海  
藻飴糖○陽起石忌羊肉○銀及水銀輕粉忌一  
切血○有朱砂空青勿食生血物○龍骨忌魚○  
有麥門冬勿食鯽魚○有天門冬勿食鯉魚誤食  
中毒則浮萍解之○枸杞與乳酪相惡○乾漆忌  
油脂○服黃精禁食梅實○猪膏忌烏梅○杏仁  
忌粟米○當歸忌熱麵○威靈仙忌茗及麵湯○  
厚朴忌豆食之動氣○烏頭天雄忌豉汁

臘藥用法

清心元 治不語恍惚煩鬱痰熱傷寒發熱心氣不  
足神志不定一切病發熱等證又治卒中風不省  
人事痰涎壅塞精神昏憤言語蹇澁口眼喎斜手  
足不遂每取一丸溫水化下

蘇合元 治傳尸鬼氣卒心腹痛霍亂時氣瘴瘧暴  
痢赤白月閉痲癩小兒吐乳大人狐疝等疾大能  
順氣化痰又治一切氣痰及中風上氣氣逆氣鬱  
氣痛○有龍腦則名龍腦蘇合元每用四九早朝  
空心井華水下或溫酒下

醒酬湯  
烏梅肉半斤  
草果一兩  
縮砂  
白檀香五錢  
煉清蜜五斤  
同煎和化水  
切法見  
前法  
清蜜八升  
阿膠一斗并  
桂皮半三錢  
胡椒半三錢  
丁香半三錢  
乳香半一錢  
木香半一錢  
入蜜中一沸  
待凝用之



牛黃涼膈元 治上焦壅熱風痰蘊積口乾喉痛唇  
焦頰赤口舌生瘡渴而不安用一丸又治小兒急  
驚用半丸并薄荷湯下又治咽喉腫痛口舌生瘡  
頰頰赤腫熱痰壅塞

加減薄荷煎元 治頭目眩昏口舌生瘡痰涎壅塞  
咽喉腫痛除風熱消瘡疹又治風熱咽喉腫痛一  
名龍腦川芎丸每用一丸噙化嚥之

龍腦膏 治證與薄荷煎元同  
神保元 治諸氣注痛又治心膈痛腹脅痛腎氣痛  
每五七丸薑湯溫酒任下

感應元 治虛中積冷氣弱有傷飢飽飲食心下脅  
間堅滿霍亂嘔吐久痢赤白膿血相雜米穀不化  
中酒嘔吐惡心頭旋四肢倦怠妊娠傷寒小兒傷  
滯赤白或進或退連綿不絕又治積痢久痢赤白  
膿血相雜每用一丁米飲調下或作丸菘豆大十  
丸吞下

溫白元 治心腹積聚癥癖積年食不消下黃疸鼓  
脹十種水氣八種痞塞五種淋疾九種心痛遠年  
瘡疾及療七十二種風三十六種尸疰癩狂邪祟  
一切腹中諸疾溫酒或并華水下



好合茵陳丸 治天行病急黃疸及瘴癘發黃三丸  
或五丸溫水下

九味清心元 治證與清心元大同小異治熱之功  
尤捷

至寶丹 治中風不語諸毒山嵐瘴氣蠱肉水毒產  
後血暈悶亂難產又治小兒諸癇急驚卒中客忤  
不得眠煩燥風搐每用二三丸至五丸人蔘湯下  
或小便和薑汁用之又治卒中急風不語不省人  
事及風中臟精神昏冒

至聖保命丹 治小兒胎驚內疝腹肚堅脹目睛上

視角弓反張一切急慢驚風痰涎等證又治急慢

驚風及胎驚天弔初生小兒半丸乳汁下周歲兒

一丸薄荷湯下十歲以上二丸薄荷湯下

催生丹 治產婦生理不順產育艱難或橫或逆每  
用一丸溫水下

水煮木香膏 治脾胃受濕臟腑滑泄腹痛無度腸

鳴水聲不思飲食每欲下痢裏急後重或下赤白

便膿又治一切諸痢每一丸水一盞棗一枚同煎

四五沸和泔食前服

九痛元 治九種心痛及卒中惡腹脹痛口不能言



又治連年積冷流在心胸并墜落傷損又治九種心痛及積冷心胸痛三五丸温酒下

瀉青丸 治肝熱急驚搐搦每用半丸或一丸竹葉湯或砂糖水化下

稀痘兔紅元 初生小兒二三丸乳汁送下一歲兒五丸或七丸三歲後十五丸久服則遍身發出紅斑是其驗也臘日或初八日為丸

錢氏安神丸 治邪熱驚啼心疳面黃頰赤壯熱又治急驚風及心熱驚啼每用一丸砂糖水化下  
木香保命丹 治諸風眩暈中風口噤手足偏枯頭

七寶既道丸  
鹿角細生斤可  
龍腦三兩

人參末斤四兩

半斤夏枯草末六兩

右各末七兩

去身皮取肉皮

五兩中意者

必系末四兩各

山作粉化元力

衣生炒重吳

六毛粉介春

下則百病得效

目昏暗心神恍惚及諸般冷氣又治中風一切諸證每用一丸細嚼酒或熟水下或沉酒服之

捉虎丹 治四氣為脚氣無問遠近一切注痛臨發

時空心一丸趕到脚面上必赤腫痛不散再服一丸趕到脚心中出黑汗乃除根又治中風癱瘓手足麻痺不仁偏枯不得屈伸每用二丸温酒下

保安丸 治產前產後諸疾每用一丸温酒下

紫金丹 治蠱毒桃生毒狐狸鼠蟻惡菌河狍灰牛馬肉毒山嵐瘴氣毒諸藥金石草木鳥獸百蟲一切諸毒自縊落水鬼迷驚厥心頭温者並冷冷水



壯元九 醫經神卷

遠志子製

龍眼肉

生地黃洗

玄參

朱砂

石菖蒲多三

人參

白茯苓

黃連

孩棗在

考門冬

柏子仁玄油

右心未指心

仍北金兩為

不糯米四在

神心寧神

明健壯

磨灌蛇犬傷酒磨調下每用半錠或一錠薄荷湯

下

靈寶丹 治推下積滯一切無名惡瘡毒腫每用一

丸涼水下如欲三五行先吞涼水三五口

萬病元 治七種癰塊八種痞滿五種癩癧十種疰

忤七種飛尸十二種蠱毒五種黃疸十二種瘧疾

十種水痢八種大風十二種濕痺及積聚脹滿久

遠心腹痛疳蛔寸白諸虫久積痰飲消瘦疲困或

婦人子臟瘀血凝滯因此斷產服此藥以三丸為

一劑不過三劑其病悉除說無窮盡故稱為萬病

元用之以吐利為度

小兒清心元 小兒諸熱及驚熱煩燥每用一丸竹

瀝下

抱龍丸 治驚風潮搐身熱昏睡能下痰熱百日内

兒一丸三分用五歲兒一二丸溫水化下

玉樞丹 治法與紫金丹同

臍享膏或云蠟香膏 治諸凍瘡不差臨用以藥水

先洗後塗諸瘡皆可

神聖辟瘟丹 辟瘟正元焚一炷四季保平安

備急元 治心腹諸卒暴百病已死者折齒灌之中

二三歲兒腹疼  
白礬石神黃  
各一錢末和乳  
早投連三日  
當痛日腹上痛  
處書田母男子  
書圖女子書



臨產前事和  
寒連服補氣  
產後脫衣平  
血冷之致木考  
同蒸紙付於  
腹部

治難產杏仁散  
去皮一盞書日  
字一盞書月字  
蜜塗白沸湯  
或酒吞下○單  
麻子二箇搗付  
足掌中湯泉

穴產後即去  
之若遲則生  
帶下  
洗之  
法海衣食湯  
灰中溫服  
浮衣煮著  
飲中洗身  
入腹中付於  
浮高處  
產後身不貼  
席苦痛生刺  
沐清酒童便  
各一兩兒溫和  
服

惡客忤尤妙每用三丸

解毒雄黃元 治喉閉口噤水漿不下危急者每用

七丸茶清下若口噤醋和灌鼻

鬼哭丹 治痰瘧每用三十丸隔夜臨睡冷酒吞下

次日早再服

勝金丹 治諸瘧久不愈服法上同

脾寒丹 治諸瘧

安胎丸 治懷孕四五月常墮不安一二丸白湯下

解諸中毒

凡解毒之藥皆不可熱飲能使毒氣愈甚宜冷服之

乃效○手足面青過時者不救治法上宜吐之急

以香油多灌鵝翎探吐之下以芒硝甘草湯調服

利之○人自服毒者宜急救之大法甘草菜豆能

解百毒又法不問何毒多灌香油吐利即安○通

治百物毒細茶白礬每取三錢末新水調服即效

又五倍子為末好酒調下二錢在上即吐在下即

瀉又甘草細末微炒隨酒量多少好酒調服須臾

大吐瀉雖渴不可飲水飲水則難救又臍雪水取

飲之○甘草黑豆皆解百藥百物毒各取五錢水

煎溫冷任意服神效或加竹葉或薺芫尤效○凡



中毒即燒所食之物作末服之

解一切飲食毒

中毒煩悶甘草薺芫濃煎湯飲之入口即活又白扁豆末水調服二三錢得利即安又人屎取汁服之又白狗糞和水絞汁又藍葉或藍實濃研汁飲之又多飲香油即差

解熱麩毒

枸杞根皮煮汁飲之又蘿菘汁飲之無生者則取水研取汁飲之又杏仁研煎汁飲之

解豆腐毒

皂米洗水溫服即效

偏頭痛羅菘汁入龍腦小許滴入鼻孔左右痛則滴在左右痛反之

過食腹脹氣塞欲死新汲水多飲即安若飲熱酒即死又蘿菘汁煎湯飲之又杏仁研煎濃汁飲之○過飽幾死着垢組或着垢衣領皮水洗飲之即解

解燒酒毒

過飲中毒面青口噤昏迷不省甚則腐腸穿脅遍體青黑吐下血死在須臾初覺便脫衣推身滾轉之無數吐之則甦又以溫湯裸體浸灌常令得煖若灌冷水即死又急取生瓜及蔓搗取汁幹開口灌之不住又碎冰納口中及肛門以醒為度又葛根搗取汁灌口中○柿葉搗汁灌之



解諸獸肉毒

食六畜肉中毒或吐下血胡荽子一升碎煮取汁冷服半升日二又犬屎燒灰和酒服一錢又生韭汁一二升飲之又人頭垢和水服吐出卽愈又水浸豆豉絞取汁數升服之○食諸肉中毒煮橘皮汁或蘆葦根汁或黑豆煎汁或犬黃煎汁或川椒煮汁可飲○鳳仙花根莖葉取汁飲之又飲好酒大醉卽解又生山藥水磨服神效

食牛肉中毒甘草濃煮飲一二升卽愈○人乳汁一二升飲又黃栢末三錢和水服又牛黃和水服○韭汁或人屎汁飲之又人頭垢熱水調服吐出○食牛肉脅間刺痛不可忍手足青黑頃刻間氣絕者三四卽服野人乾一盞無效又服一盞脅間急痛如裂有如脫落之聲聲聞傍人其痛卽止累試神效又牛黃五分服之卽效累試皆驗○食牛肝膾忽然咽喉疼痛不可開口視之則喉隘間毒肉亂生或如肝片或如重舌狀頃刻間咽喉閉塞氣息奄奄急以鍼亂刺毒肉生處出血一二升吞水漸差

食馬肉中毒韭汁飲之又犬屎燒灰和酒服又蘆根



煮取汁飲一二升又多飲好清酒至醉即解濁酒

則又加香豉二兩杏仁三兩和蒸一炊久熟杵服

日二仁一云只取杏○食馬肝中毒人頭垢和水服

又雄鼠屎三七枚研和水服

食狗肉中毒蘆根煮汁飲之又杏仁去皮研水煎去

滓飲利下血片為效熱湯三盞拌勻分三服所食

肉皆全片瀉出

食羊肉中毒煮甘草汁一二升飲之

食生肉中毒地漿飲之掘黃土地作坎以水沃其中攪令濁俄頃取清飲之是謂

漿地

食自死禽獸肉中毒黃柏末三錢水調服不解再服

又人頭垢一錢熱湯化服又黑豆煎汁藍葉汁人

糞汁皆可服

食中毒箭从禽獸肉中毒狸骨燒灰和水服又黑豆

汁藍汁飲之

解諸禽肉毒

食鵝鴨肉中毒糯米泔或温酒飲之又秫米水研取

汁飲一盞

食雞肉中毒吐下犀角末和水服一錢或以水濃磨

取汁飲



食野鳥肉中毒狸骨燒灰和水服又黑豆汁藍汁飲

之

解諸魚毒

食魚中毒飲冬瓜汁最驗又濃煮橘皮汁飲之又海

獺皮

似獺大如犬毛着水不濡生海中

煮汁飲之又鮫魚皮有皮上

珠斑堪指木如木賊生海中

燒灰和水服○大豆汁紫蘇汁服

之

食鱸魚中毒蘆根煮汁飲一二升生汁亦可

食鱧鰲中毒豉一合投新汲水半碗取濃汁頓服即

愈

食河狔中毒諸魚中河狔最毒其卵尤毒中者必死

急取蘆葦根搗取汁飲之或人糞汁或香油多灌

吐出即愈又白礬末白湯調下又白扁豆末和水

服又羊蹄葉搗汁飲之○藍汁服之又煮秦皮飲

之又槐花末三錢新汲水調服或煎服又紫蝦醢

或生紫蝦喫之

解蟹毒

蟹未經霜者有毒中之者飲生藕汁冬瓜汁煮蒜汁

並佳又紫蘇葉煮汁飲之又黑豆汁豉汁並解之

中毒或死急取冬瓜紫蘇葉大黃汁解之即差○蘆根汁解之



解生膾不消

食膾不消生薑汁飲一升即消又日久不消成癥取水中石子數十枚燒赤投五升水中七次熱飲三五度當利出癥○食厥腦髓即消

解魚肉不消

食魚肉不消成癥作痛狗糞五升燒存性為末綿裹漬五升酒中經宿取清分十服即差○凡過飽魚肉積滯不下者食厥腦髓即消

解諸菜毒

食諸菜中毒烏雞屎燒研末一錢和水服又香油多

飲之即安又葛根濃煎汁服之生汁尤佳又甘草湯飲之又人乳汁或小兒尿服二升即愈

解菌蕈毒

菌蕈夜中光者煮不熟者煮訖照人無影者皆有毒人中其毒急取地漿飲之又人糞汁飲之又馬蘭根葉搗汁飲之又人頭垢和水服以吐為度又六畜及鴉鴨之屬刺取熱血飲之又油煎甘草冷飲只多飲香油亦好○瓠瓢燒灰和水飲之○中蕈毒吐瀉不止細茶芽即雀舌茶為末新汲水調服神效又荷葉搗爛和水服○楓樹菌食之令人笑不止

楓樹菌食之笑不止掘地以塗取飲謂地漿毒瘴諸菌毒



而歿飲地漿最妙人糞汁次之餘藥不能救

解苦瓠毒

食苦瓠吐利不止則歿飲黍穰灰汁解之○稷米研取汁飲之即愈

解海棠毒

凡海中菜多食損人令腹痛發氣吐白沫飲熱醋即安神效

解諸果毒

食諸果中毒桂皮濃煎飲之又猪骨燒灰末一錢和水服又瓜蒂末一錢溫水調服吐之即差

食銀杏中毒香油多飲吐之又地漿藍汁甘草汁飲之

食桃得病取桃梟燒爲末和水服即愈

食雜菜果子過多腹脹氣急桂心爲末飯丸菜豆大

以水吞下十丸未愈再服又桂心末五錢麝香一錢飯丸菜豆大白湯下十五丸即效

治葍毒石首魚炙食或者煮汁服自消

解諸藥毒

服藥過劑或中毒煩悶欲死葛根搗取汁飲之或水煮取汁服之又藍葉或藍實搗汁飲之又地醬飲



之又生雞卵取黃吞之又粳米粉和水服之又豉  
汁飲之○甘草濃煎服又薺芫取汁服又黑豆煮  
汁飲又甘草黑豆薺芫同煎服之尤佳又韭汁飲  
之○真黃土煮取汁煖飲之又六畜及鴉鴨皆取  
熱血飲之即差

巴豆毒令人大吐瀉煩渴發熱急用黃連黃柏煎湯  
冷服又菖蒲或葛根搗取汁飲之更以冷水浸手  
足忌食熱物又藍根砂糖搗爛和水服又黑豆煮  
取汁飲又寒水石磨水飲之

烏頭即川鳥也天雄附子毒鳥頭者為鳥頭

兩歧者為鳥頭細長至三四寸者為天雄根  
傍如芋散生者為附子傍連生者為側子中者

心煩燥悶甚則頭涿涿然遍身皆黑必死甘草黑  
豆濃煎服入口即定又萊豆黑豆煮汁冷服之又

乾薑煮汁冷服之又多飲冷水大吐瀉即愈  
草烏毒令人麻痺暈悶甘草黑豆濃煎汁飲之又生  
薑汁飲之乾薑煎汁亦可又童尿飲之

茛菪毒令人大煩悶眼生星火狂走見鬼水研萊豆  
汁飲之又甘草薺芫煎汁飲之又甘草黑豆濃煎  
服又蟹汁服之

大戟毒即澤漆根也令人冷泄不禁薺芫煎汁飲之又菖



蒲搗取汁飲之

狼毒毒杏仁研水和取汁服又藍葉汁飲之

藜蘆毒令人吐逆不止蔥白煎湯飲之又溫湯飲之

又雄黃末和水服又香油多灌之

躑躅毒令人恍惚吐逆山梔煎汁飲之又甘草黑豆

煎服○香油多灌之

半夏南星毒生薑汁飲之又乾薑煮汁服之

苦練根毒令人瀉不止飲冷粥止之

杏仁毒杏子雙仁誤食必死藍葉汁飲之又藍實水

研取汁飲又地漿飲三三碗又香油多灌之

川椒毒誤食椒戟人咽喉氣閉欲絕喫大棗三枚解

之誤吞合口椒氣欲絕身體冷痺急飲井水一二

升便差又地漿飲之又飲黑豆汁或人尿○葵菜

汁或飲之

斑猫茺青毒令人吐逆不止急用菜豆或黑豆或糯

米和水研取汁服又藍汁飲之又猪肪服之

艾毒艾葉久服亦有毒毒發則熱氣冲上狂燥不能

禁至攻眼有瘡出血者甘草黑豆煎湯冷服之藍

葉汁菜豆汁飲之

解石藥毒



人服諸石藥中毒人蓼煮汁服又鴈肪服之又白鴨屎為末和水服

礬石毒黑豆煎汁飲之

雄黃毒防已煎取汁飲之

硫黃毒令人心悶取諸羊熱血飲之又宿冷猪肉及

鴨肉羹冷食之又黑錫煎取飲之

礪砂毒生菜豆水研取汁一二升飲之

砒礪毒令人煩燥如狂心腹攪痛面口青黑四肢逆

冷須臾不救急取黑鉛四兩磨水一碗灌服即解

如無黑鉛則青藍汁一碗灌服或香油一二升灌

服又人糞汁多灌之又地漿三碗和鉛粉頻灌旋

刺猪狗羊雞鴨熱血飲之又臍月猪膽水和服之

立解又稻稈灰淋取汁冷服一碗毒隨利下又冷

水研菜豆取汁飲之又藍根砂糖搗爛和水服○

好白蠟五六錢搗細冷水調灌

解金石毒

中毒者取黑鉛一斤鍋內熔成汁投酒一升如此十

數遍候酒至半升去鉛頓服○黑豆汁藍葉汁水

芥汁白鴨屎淋汁皆宜

解金銀銅錫鐵毒



有蟲在飲食  
法祖境當效

金銀銅錫鐵毒服水銀卽出又鴨血飲之又白鴨屎  
淋取汁飲之又生雞卵吞之又黑豆汁或藍葉汁  
水芹汁飲之○錫胡粉毒杏仁研汁服之○鐵毒  
者磁石飲之肥猪肉煮冷食之又猪脂服之

### 解蠱毒

凡有蠱之家門限屋梁無灰塵潔淨當用心防之入  
蠱鄉遇飲食以犀角攪之白沫竦起者是蠱也遇  
食蠱家潛於初下筯時收蔽一塊在手盡喫不妨  
少頃却將所蔽一塊潛埋於人行十字路下卽蠱  
於其家作鬧蠱主必反來求救或食時讓王家先

動筯或明問王家云莫有蠱麼以筯築卓而後食  
則蠱不能爲害○中蠱毒者心腹切痛如有物咬  
面色青黃或吐血或下血不卽治蝕五臟盡則死  
死後病氣流注染着傍人○驗蠱法令病人朝起  
取井水唾水中唾如柱脚直下沉者是蠱也浮者  
非蠱也又嚼生黑豆不腥嚼白礬味甘皆中蠱也  
又煮一雞卵去皮日夕含口中勿令破夜吐出着  
霜露中朝看色大青者是蠱也○送蠱法敗鼓皮  
燒爲末水調服一錢病人須臾自呼蠱主姓名令  
取蠱去卽愈又取葇荷葉密安病人卧席下勿令



知病人自呼蠱王令取去即愈○取藁荷葉搗取  
汁服之周禮以嘉草除蠱毒嘉草即藁荷也○治蠱法紫金錠半錠  
重者一錠用薄荷湯化下又服玉樞丹一錠或吐  
或利而愈又白礬甘草等分爲末清水調下或吐  
黑涎或瀉下即安又甘草湯服之又升麻一兩水  
煮取濃汁服又馬蘭根爲末水和服一二錢又槲  
木北陰白皮濃煎取一升空心服並即吐蠱又馬  
兜鈴根爲末一兩水煎頓服當吐蠱未快再服又  
商陸末和水服又續隨子去皮研爲末和水服一  
錢又斑猫一枚去頭足翅研爲末和米飲服並即

下蠱又斑猫去足翅熬大戟桃白皮東引者三物  
等分爲末冷水調服半錢其毒即下若未出更一  
服奇效且單服大戟亦好又蠶退紙不拘多少以  
麻油紙燃燒存性爲末新汲水調一錢頓服雖面  
青脉絕昏迷口噤吐血者即甦又藍葉汁飲之又  
茜根濃煎服之又與藁荷同煎飲數升即愈又桔  
梗搗汁飲之危重者亦甦又蚯蚓十四枚醋一升  
漬之蚓死但飲其汁則下血如爛肝已死者皆可  
活又蜈蚣炙爲末和米飲服亦可又狐五臟及腸  
和五味煮作羹食之多食亦良有人病蠱夢食狐



病自消覺而有狐入室烹食遂差○有人在海西  
買喫鰕醢患腹痛甚暴知其中蠱毒卽多飲燒酒  
乃吐所食醢物已蠢動作魚形其病遂愈

解馬毒

馬毒瘡婦人月經血塗瘡仍飲之又生菜及馬齒莧  
搗付之又飲馬齒莧汁又飲馬糞汁以馬尿洗之  
又糯米飯冷罨瘡上卽愈○馬汗入瘡毒氣攻作  
心悶欲絕燒粟稈灰濃淋作汁熟煮蘸瘡須臾白  
沫出盡卽差白沫卽毒氣也又馬汗毒氣引入如  
紅線先以鍼刺瘡口出血烏梅和核爛研醋調塗

之又馬齒莧取汁飲之又生烏頭末付瘡上良久  
黃水出立安又白礬枯黃丹炒等分調貼瘡上又  
馬汗及毛入瘡腫痛以冷水浸瘡數易飲好酒立  
愈○開剝死牛馬中毒遍身生紫疱俱潰叫痛急  
服紫金錠吐瀉卽愈

解煙熏毒

炭煙熏人頭痛嘔吐往往致死生蘿菹搗取汁飲之  
卽解無生則蘿菹子水研取汁服亦解

治湯火傷

爛瘡痛牛屎濕付之又醋滓付之又醬汁塗之又白



蜜塗之止痛又蝌蚪搗付之又以好酒洗以鹽付  
之又梔子末雞子清調塗又大黃末蜜水調塗又  
炭末香油調付並即差○凡被火傷即以醋水塗  
之仍貼以紙連塗令濕雖至焦爛止痛後又無痕  
又毛段燒作末油付又新尿冷飲之以月經水洗  
之○取厨下溝水塗之神效

治熱油傷

蕎麥粉醋調傅之又寒水石末油調塗之痛立止

治金刃傷

金瘡傷重暈絕不省人熱尿多灌即甦童尿尤好又

全瘡掃殼大  
棗研乳吉付  
之立效

傷重痛悶欲死納牛腹中即甦○金瘡血不止急  
以石灰末裹之又石灰末和雞子白火煨爲末糝  
之立止又梁上塵取傅之又蛇含草搗傅之又壁  
錢細如取汁點傷處○牛蒡葉入鹽少許搗付藍  
葉汁入牛黃麝香少許塗之○失血則當渴然須  
忍之可與肥脂之物以止其渴○金瘡腸斷一頭  
見者不可連兩頭見者可連續之先以鐵縷續其  
斷腸便取雞冠血塗其際勿令氣泄即推納之○  
金瘡腸出不斷者急以清油燃活推納之續以桑  
白皮作線縫合肚皮取雞冠血塗之而外重皮則



不縫糝藥仍服通利藥勿令二便秘澁若腸與脂膏俱出用手擘去膏不妨此是閑肉放心去之然後推腸入納初飲粥清二十餘日乃喫糜粥百日後乃可進飯○金瘡腸出不能納者小麥五升水九升煮取四升去滓令極冷使人含嚙瘡上及背則漸入勿令衆人見又新汲水噴之令身緊腸自入並勿令病人先知○使四人執病人卧席舉搖之腸自入○乾人屎抹於腸腸即自入○凡金瘡忌嗔怒及大言笑動作勞力及食鹹酸熱酒熱羹皆使瘡痛衝發甚者即死○凡金瘡及折傷不可

飲冷水血見寒則凝入即死○凡金瘡及墜傷折傷必有瘀血停積宜先逐去瘀血花蘂石四兩硫黃一兩爲末入瓦罐內鹽泥固濟晒乾安四方磚上以炭火從巳午時煨至經宿候冷取出研細先糝傷處其血化爲黃水每取一大匙童尿入酒煎熱調服則臟腑瘀血化爲黃水或吐出或下泄○刀斧傷桑白皮剥取裏之令汗入瘡中又蘇木末付之蠶蠶包付數日如故又急取白糶付之藍葉汁飲之

治砲矢傷



戰陣砲矢所傷流血滿體悶絕者牛一隻剖腹納其人浸血中卽甦○箭鏃入骨不可拔取蜣螂全者入麝香少許爲末菴之卽出又鼠腦及肝塗之又螻蛄同硫黃研付自出○毒箭傷芋根搗付日夜數易藍葉汁飲之

### 治打撲傷

瘀血在內煩悶欲死蒲黃三錢熱酒調服又白楊樹皮酒漬飲之又生麻根葉搗取汁飲一升非時則取乾麻煮汁飲又童尿熱飲一二升卽甦又犬屎燒存性爲末熱酒調服二匙犬膽一枚分二次溫

酒調服惡血盡下○打撲傷痛不可忍取蔥白入塘火煨乘熱擘開其中有涕便菴傷處冷則易熱者須臾痛定又芥子和生薑研微炒貼之亦妙

### 治墮壓傷

凡墮壓死者心頭溫皆可救急安好處以袖掩其口鼻上一食頃候眼開先灌熱小便又薑汁香油攪勻灌之又蘇合元三五丸溫酒童便調灌卽甦○松煙入好生酒灌之○半夏或皂角末吹鼻得嚏亦甦○被墮壓或舟車轢馬踏牛觸胸腹破陷四肢摧折氣悶欲死烏雞一隻合毛千杵和醋一升



以新布搗病處取藥塗布上罨定乾則易之覺寒振欲吐不可去藥須更復一雞神效又烏雌雞右翅羽七枚燒灰和酒服當吐血便愈○墮壓傷瘀血疼痛取水蛭炒焦麝香等分爲末熱酒調一錢服又稻稈燒灰取新熟和糟酒淋灰取汁乘溫淋洗痛處立差

### 治骨折筋斷

折傷筋斷骨碎生地黄取汁和酒溫服滓付患處又生地黄熬之裹傷處一日一夜十易一月筋骨連續又取蟹腳髓及殼中黃微熬納瘡中包裹即連

筋骨又取牡鼠生搗付之三日一易又萵苣子微炒末酒服二三錢能接續筋骨○骨折取自然銅火煨醋碎七次研極細水飛同當歸沒藥末各半錢溫酒調服仍以手摩傷處此藥直入骨損處束之神效此藥新煨者有毒若不折骨不碎骨則不可用○山梔生爲末五分飛羅麵三錢薑汁和搽患處一日夜皮肉青黑是其驗也○腦骨破蔥白和蜜細研厚傅損處立差又取夜合樹皮去麤皮剉炒黑色四兩芥菜子炒研一兩末每二錢熱酒調澄清臨卧飲滓罨傷處妙○被斫筋斷急取旋



治水腫四螺  
蒜車前叶和研  
為膏位大餅  
覆臍上水後  
便出

覆花根搗汁瀝滄中滓付傷處半月便續

治手足折傷

手足折傷出曰痛不可忍急用白礬末一匙和沸湯  
一碗乘熱重洗傷處痛止若出外則須搦入內若  
出內則須搦入外看骨歸舊曰蔥頭粉瓦上炒紫  
色熱酒醋同調成膏厚傅傷處用桑木或柳木片  
夾定麻繩縛扎時時解扎拽屈拽直否則愈後曲  
直不得成痼疾○接指方蘇木為末敷於斷指間  
接定外用蠶蠶包縛數日如故○跌傷作腫痛不  
可忍梔子白麵為末水調搽之乾則灑水即效

治肢節脫解

四肢節脫但有皮連不能舉動名筋解黃芪三兩酒  
浸一宿取出焙乾為末每二錢酒下

治耳鼻舌傷斷

治擦落耳鼻用油髮灰末乘急以所落耳鼻蘸髮灰  
綴定以軟帛縛定神效○顛仆穿斷舌心血出不  
止取米醋以雞翎刷所斷處其血即止仍用蒲黃  
杏仁鵬砂少許蜜調噙化而愈

治陰囊傷破

有人落馬被所佩鎖匙傷破陰囊二丸脫落懸掛未



斷痛苦無任有醫教其人漫漫托上多取壁錢敷貼傷處日漸就安其囊如故

治杖傷

杖傷忽乾黑陷毒氣攻心恍惚煩悶嘔吐者死凡杖畢卽用童便好酒各一鍾合而溫服免血攻心甚妙仍用蔥白搗爛炒熱搽杖處冷則易之止痛散瘀如神又片豆腐鹽水煮熱鋪杖處其氣如蒸豆腐卽紫復換貼之以色淡爲度潰爛者亦宜又鳳仙花連根葉搗爛貼之乾則易一夜血散卽愈又痛甚者以熱酒盡量而飲刺出惡血以大黃黃栢

爲末生地黃汁調付之○大黃爲末童便調頻付

治人咬

人咬成瘡龜板或鱉甲燒灰油調付

治熊虎咬

熊虎爪甲傷嚼生栗付之○熊傷人煮葛根取濃汁以洗瘡十度并搗葛根爲末調葛根汁服日五次○虎咬傷生葛汁飲之又洗瘡又杵薤取汁飲一升日三滓付傷處又飲清油一椀又白礬爲末納傷處又飲酒常令大醉當吐毛出良又砂糖水調服一二椀并塗傷處又生雞肉食之又月經赤衣



燒爲灰和酒服一方月經衣灰酒○月經衣布付  
之傷處又白礬末納瘡中裹之

治牛觸腸出

腸出不斷者急以清油摸腸用手推入以桑白皮尖  
縫合肚皮縫上糝血竭末或百草霜末○以熱尿  
常洗之或枸杞根皮煎湯洗之妙

治馬驢騾咬踢

馬或驢咬人取其尿洗瘡以糞塗之又飲糞汁佳○  
馬咬踢取益母草搗爛和醋炒付又獨顆栗子嚼  
付之燒灰貼亦妙又取雞冠熱血塗之又用艾灸

傷處取人屎或馬屎燒灰爲末付之○被騾跑倒  
又咬傷膿潰臭惡蛆蠅極盛服蟬花散

治犬咬

春夏初交犬多發狂但見其尾直下不捲口中流涎  
舌黑者卽是狂犬若被其咬九死一生急用鍼刺  
去血以熱小便洗淨卽殺所咬犬取腦付之或用  
杏仁嚼爛付之以帛繫定或同馬藺根研細蔥湯  
洗後塗之急用斑貓七箇去頭足翅爲末溫酒調  
服其毒必從小便中出可將尿缸盛清水令患人  
尿其中停半日見濁氣凝結如狗形則毒旣出無

以水沃灑釜上  
壁土令流下待  
膏土土潤取其  
土作片付咬處



則須服七次極驗若小便澁益元散水調服一方  
斑貓七日內用七箇七日外每日加一箇十日十  
箇百日百箇去翅足糯米同炒滑石一兩雄黃一  
錢麝香二分半爲末溫酒調服不飲酒者米飲下  
毒從大小便出卽愈○患人頂心有一或云三紅髮  
卽拔去後服藥快效又常食杏仁以防其毒或作  
粥食之又常食韭菜常飲韭自然汁又葛根汁飲  
之又蚯蚓糞封咬處出犬毛神效○咬瘡久不差  
口吐白沫叫喚似犬聲爲犬毒入心也蟾蜍作膾  
食數次勿令知又取後兩腿擣爛酒調服亦可又

虎頭骨虎牙虎脛骨爲末酒調服二錢○虎膽和  
水服又黑豆煮汁服○治法無出於灸只取咬牙  
跡上一日灸三壯至一百二十日乃止永不再發  
一方連灸限三○禁忌法被咬者終身禁食犬肉  
月勿令完合及蠶蛹此毒再發則不可救三年內忌食一切毒  
物及房事又忌飲酒

治猪咬

屋漏水洗之又松脂作餅付之

治猫咬

取薄荷葉細嚼付之又虎骨虎毛燒爲末塗之



治鼠咬

取猫毛燒灰麝香小許津唾調付○猫糞塗之○生薑擦猫口取涎塗之

治蛇咬

蛇咬頻塗人乳汁又青魚白卵沉水待潤貼之即效  
○治蛇毒無如雄黃取細末貼瘡口立效又萵苣汁和雄黃末貼瘡口毒水流出腫毒即消又即以白礬火上熔汁滴咬處立差無白礬則速作艾炷灸五壯良又干蛇毒眼黑口噤欲死蒼耳嫩葉一擔摘取汁温酒和灌之滓付瘡上又白芷末麥門

魚鱗煎水  
或飲或洗

冬湯調服滓付傷處又毒蛇螫急以熱人尿洗出血次取口中唾塗之又取人屎厚付布裹即消又急飲好醋二椀令毒氣不隨血走清油亦可又凡蛇毒取獨頭蒜或小蒜或水蓼或苦苣或豆葉或荏葉取汁飲滓付之又生蝦蟆搗付又生雞卵敲作一小孔合咬處又牛耳中垢猪耳中垢取付之○即刮自己耳中腦子納傷處○真末和冷水服又和水作餅付咬處及浮氣去處即消神效○忌食酸物梅子犯之必大痛○蛇入耳鼻口中挽不出急以刀裂蛇尾納川椒胡椒二三粒裹着即出



又以前書  
又以艾灸蛇尾即出又割母猪尾頭瀝血入口中  
并孔中亦出後取雄黃末調人蔘湯服制蛇毒○  
蛇繞身不解以熱湯淋之無湯則令人尿之即解  
○毒蛇尿草木着人似刺割便腫痛內爛若着手  
足指節墮落研砒礪和膠清塗之○蛇骨刺人腫  
痛燒死鼠爲末付之○大豆葉搗付

治蜈蚣咬

取蜘蛛安咬處當自吸毒蜘蛛死即投水中救活更  
用生者吸之又烏鵲血及屎乾則水調塗之又獨頭蒜  
研塗之又蝸牛取汁塗之○桑白皮取汁塗之又

地龍汁塗之又木米作餅付○雄雞冠血塗之

治蜘蛛咬

蜘蛛咬人腹大如孕瘡中出絲屢有死者惟飲牛乳  
可制其毒又蜘蛛咬遍身成瘡飲好酒大醉蟲於  
肉中小如米自出又青蔥葉去尖納蚯蚓一條緊  
捻頭勿通氣候化水點咬處即差又藍汁一碗入  
雄黃麝香末各一錢和之細飲其汁并點咬處腫  
痛垂死者即愈只服藍汁亦好又桑白皮汁塗之  
又雞冠血塗之又雞卵敲作小孔合咬處立差○  
醋磨生鐵塗之○壁鏡一名壁錢咬毒人必死桑



灰淋濃汁調白礬末塗之又醋磨雄黃塗之

治蠼螋傷

又名八角蟲如小蜈蚣色青黑長足俗號影子蟲

此蟲隱於壁間以尿射人遍身生瘡如熱癩而大繞腰匝不可療烏雞翎燒灰雞子清調塗之又取扁豆葉接付即差又鹽湯淋漬瘡上數日愈又雞屎塗之

治蜂螫

青蒿嚼付之又薄荷接貼之又芋莖接擦之又冬瓜葉接付之○酒糟或醬罨傅○醇酒塗之又薄荷搗付

治雜蟲咬傷

蝸牛咬人毒遍身者蓼子汁浸之即差○螻蛄咬人石灰醋和塗之

天蛇

即草間黃花蜘蛛也

毒人被其螫因為露水所濡乃成疾似癩而非癩煮秦皮汁飲之差

蚯蚓咬雞屎塗之又急煎鹽湯浸洗

五毒蟲毛螫赤痛不止馬齒莧接付之

諸毒蟲咬傷大紙燃蘸香油燒火吹滅以煙熏之即

愈又小薊或藍葉搗汁飲又付之○香油浸紫蘇

塗之



耳痛用金箔  
去毒若苦酒洗  
滴耳中即效  
壯陽方取於晴時  
去頭翅足研極  
細油中加乳三  
粒生子一升老  
能媚小姬

諸傷辟蠅蛆法

夏月諸傷損潰爛蛆蟲極盛臭不可近蛇退燒存性  
一兩蟬殼青黛各五錢細辛二錢半為末每三錢  
黃酒調下日二名曰蟬花散服之蛆皆化水而出  
蠅亦不敢近又寒水石治夏月諸瘡臭爛

治諸蟲入耳鼻

取韭汁或蔥汁或薑汁或麻油灌入并即出○牛乳  
或雞冠熱血灌入亦出○生薑擦猫鼻其尿自出  
滴入即出又桃葉作枕枕之亦出又取小銅器於  
耳鼻邊敲之亦出○取鏡與陶器打作聲亦出

雷水瘧及鼠  
乳癥秋海水  
和水頻洗

治蜈蚣入耳

取薑汁韭汁藍汁灌入即出或猪脂或牛脂炙令香  
置耳邊亦出

治蚰蜒入耳

取牛乳滴入即出又蝸牛汁或小蒜汁灌入即出又  
地龍入蔥葉中化為水滴入其蟲即化為水

治蟻子入耳

取醋灌入起行即出又穿山甲燒末水調灌入又炙  
香肥脂或油煎餅枕卧即出○猪肉一指許炙令  
香置耳孔邊即出又燈心浸油釣出



治誤吞諸蟲

誤吞蜈蚣在喉悶甚急取生猪肉吃之須臾以清油灌口中即吐出繼以雄黃末水調服解毒

誤吞蝸蝓飲牛乳二升自消下

誤吞水蛭取田中乾泥小塊小死魚三四箇將猪脂溶勻用巴豆十枚去皮研爛入泥內為丸如菜豆大以田中冷水吞下十九蛭皆瀉下而愈又濃茶多飲自下又食蜜即下為水

治誤吞諸物

誤吞釣鈎連線者莫引之急取珠璫或琥珀珠水晶珠薏苡子推至鈎所引之自出○市上所在火珠可用蓋其鈎尖入於珠孔而不礙也

誤吞鍼磁石如棗核大磨令光鑽作竅絲穿令含鍼自出又吞豆一方煮熟同韭菜喫之鍼與菜從大便出

誤吞鐵釘箭鏃多食猪羊肉肥脂物必自暴出又多食肥猪肉葵菜自出又豌豆煮熟同葵菜喫之從大便出

誤吞釵環竹木薤白暴令萎黃煮熟勿切食一大束釵即隨出又多食飴糖至數斤當裹釵環竹木而



出

誤吞金銀取水銀半兩服之金見水銀如泥消出

誤吞鐵物銅錢恣食芣薺一名烏芋生濕地須臾自化出

誤吞銅鐵堅炭為末米飲調服從大便瀉出如烏梅

狀又縮砂濃煎飲之其銅自下又多食胡桃其銅

自爛又服煉蜜二升即出

誤吞木屑搶喉欲死鐵斧磨水灌之

小兒吞錢不出煮葵汁冷飲即出根葉子同功

誤吞桃李靛喉不下狗頭煮湯摩頭上差

誤吞髮繞喉不出亂髮灰水調一錢服又舊木細梳

末酒調服

治諸骨鯁在咽

諸骨鯁在咽不下嚼薤白令柔以繩繫中吞到鯁處

引之鯁即隨出又用韭白如上法以茶嚥下引之

亦出又蝸牛或鹿筋搥軟如彈丸持筋端吞之候

至鯁處徐徐引之鯁着筋即出又綿絮一小塊以

蜜煮用如上法即出又弓絃搥令頭散吞引之亦

出○威靈仙為末酒服又好醋吞嚥長在喉中不

久消化○魚骨鯁在咽取鳳仙花無則水研取汁

以匙送下不可犯齒恐致損傷又魚狗鳥似翠水

凡骨噎食飲  
鵝血昂消



牙痛藥言  
上取魚食故名爲魚狗俗號金鳥 燒灰和水服又萱草根汁飲之  
又縮砂甘草末綿裹含嚥卽吐出又飴糖作丸如  
雞子黃大吞之若不下大作丸嚼下之又鯽魚鱖  
魚鱧魚膽皆下骨鯁膈月收者又佳取皂子許溫  
酒化呷之得吐便出未吐更飲溫酒以吐爲妙未  
出更服又鯉魚鱗皮燒作屑和水服卽出○玉簪  
花醋煮不着齒吞下○大蒜塞鼻卽出又鹿角合  
之津嚥下○東流水一盞東向坐以手指水上書  
龍字訖飲之○魚骨鯁在咽取桑木上蟲屑醋煎  
灌嗽自下又將狗倒懸手起涎出徐徐嚥下其骨

化爲水如神又虎骨爲末水調服或煮汁服狸骨  
亦可又象牙磨水服卽下又雞足一對燒灰水調  
服○雞骨在咽野苧根洗淨爛搗如泥取櫻桃大  
以雞羹化下立出又白梅肉搥成大丸綿裹用線  
穿在內冷藥送下扯住線頭在手一嘔卽出

治芒刺在咽

竹木在咽取螻蛄腦吞之卽下又鼠腦厚塗哽上卽  
出又鯽魚膽和酒服卽出○鰕魚膽和酒服卽出  
稻麥芒在咽腫痛急取鵝口中涎灌之卽出又脂麻  
炒爲末湯點服妙



治諸物入目

稻麥芒入目不出有赤白二種白者入藥 根莖取汁注

目中即出○稻麥芒入眼以新布覆眼上取蟻螬

從布上摩之其芒出着良○麥芒入目煮大麥取

汁洗之即出○栗殼煎水頻洗○栗殼刺入眼蟻

螬取汁注之

沙塵諸物入眼腫痛不得開取牛筋提摩如絲着睛

上輕按之自出又好墨濃磨點睛上以新筆繳出

妙又取蜣螂一枚手持其背於眼上影之沙塵自

出○衣魚以乳汁研和注目中自出○雞肝血注

治眼生赤障者  
用白蠟一枚去  
掩以黃連末  
卷之瓦露中  
一夜曬取肉地  
為水滴目則  
障自消

之

飛絲入目腫痛不得開好墨濃磨點入目中閉少時

其絲自成塊着在睛上却用綿輕輕惹下即愈又

頭垢點入目中又刮人瓜甲上細屑以筋頭點津

唾蘸屑入目中其絲自聚拔去之又石菖蒲提碎

左眼病則塞右鼻右眼病則塞左鼻神效○菁菜

汁點之又鹽炒細末點之

治飛絲入口舌間

飛絲入口舌間生嚼蘇葉以白湯下之立效

治匙着口中

治眼障能胆  
小許淨水調  
盡去筋膜摩  
土龍腦三片  
痒則加生干粉  
時以筋點滴  
刀鈎傷處只蒸  
魚骨沙光礪石  
并赤付之  
背瘡叶叶砂  
作餅付之



匙之自着口中漸引入不解落者由於胃熱急鍼三里即落○又灸匙頭七壯即落

治諸物入肉

鍼入肉不出烏鴉翎三五枚燒灰醋調罨之自出又取雙仁杏爛搗車脂調罨自出又縷蛄腦同硫黃研傅裏定自出又鼠腦及肝塗之自出又磁石着其上自出○鍼刺竹木刺入肉不出鼠腦厚塗之即出

竹木刺入肉不出螻蛄研付之妙又螞蟥即螺贏乃黑色細腰也生研付之亦妙又躡躅碎付之即出又乾羊屎

燒灰和猪脂塗之不覺自出又烏雄雞生搗罨之自出又人頭垢一名白齒霜在梳上者是塗之又栗楔生嚼罨之又牛膝根爛搗塗之並即出○蒲公英取白汁多塗之又松脂自流者為末裏定自出

魚骨入肉不出嚼吳茱萸付之骨當爛出又象牙末厚塗自軟出又魚狗鳥燒為末和水頓服又海獺煮汁服○白梅肉爛研付之又魚鰾傳之四邊肉爛刺即出

治魚骨在肚

魚骨在肚中刺痛吳茱萸煎汁一盞飲之骨軟而出



治鬼擊

得之無漸卒着人如刀刺狀胸腹疼痛不可按抑或吐衄下血者謂之鬼擊○犀角五錢朱砂麝香各二錢半為末每二錢新汲水調灌○以好酒吹納兩鼻即差○雞白屎麻一握酒七升煮取三升熱服發汗汗不出則熨斗盛火照兩脅下汗出即愈○血漏腹中煩滿欲死雄黃末吹入鼻中又酒調一錢服日三能化血為水○灸人中立差不差則更灸○灸臍上一寸臍下一寸七壯

治鬼魘

人到客館及久無人冷房睡中為鬼物所魘但聞其吃吃作聲便令人叫喚不醒乃鬼魘也不急救則死不可近前急喚但移動些少卧處徐徐喚之又不可以火照之若元有燈則存之無燈則切勿點燈痛咬其足跟及大拇指甲邊多唾其面一云以水噴面仍用竹管吹兩耳又取半夏末或皂角末吹兩鼻中即活○梁上塵吹入鼻中又以新筆尖刺鼻孔男左女右轉轆運動則即起○宜用麝香蘇合元○伏龍肝末二錢井水調灌服更取入鼻中又生韭汁灌口中及耳鼻薤白汁亦可○若仰卧以手

於子柳夢魚通  
瘡詩付背即效  
詩曰土伯盤困九  
約身哉進角  
柱宮曼執脂亂  
沛子尋錢席戰  
交搥萬甲神珍  
張拳打破粉寬  
齋可憐水帝居  
兒鬼星驚萬風馳  
地外淪蓋三瘡  
鬼水神土克殺  
用楚辭土伯語



覆心則魘不得悟但捻下心上手然後徐徐喚覺  
傍人手及他重物皆然大法宜與鬼擊同治

治客忤猝厥

客忤者中惡之類也多於道間門外得之令人心腹  
絞痛脹滿氣衝心胸不即治亦殺人取百草霜五  
錢鹽二錢和研溫水調下○又取鹽雞子大青布  
裹燒赤研納酒中頓服當吐惡物又取緇辛桂心  
為細末納口中○蘇合元以薑汁或溫酒或童尿  
調灌○熟艾一兩水煎取汁頓服即差○銅器或  
瓦器盛熱湯用厚衣襯腹上於衣上熨之冷則易

便愈○以皂角末吹鼻或研韭汁灌耳中灸臍中

百壯

治尸厥

尸厥者即中惡之類身脉皆動而形神無知其狀若  
尸故名尸厥凡疔疔問疾或入墓發塚卒中邪惡  
手足逆冷頭面青黑牙關緊急暈倒不知人或錯  
言妄語又腹中氣走如雷鳴聽其耳中如微語聲  
者是也急取蘇合元三丸溫酒或薑湯灌下又取  
故汗衣燒末又菖蒲汁灌口中又薑汁半盞酒一  
盞煎百沸灌下仍以竹管吹其兩耳即甦○鍼人

每年立春日時運  
舍男女在腹食  
蒜叶巨一石則  
解時疾或食  
菖  
林玉帝釋  
南無天王大帝  
四天王日月五星  
三台六星北斗七星  
二十八宿俱有諸  
星神王走天  
暗喻意如律  
令望婆阿  
夜誦此七次  
則運氣自滅



濕痰腫痛不能行  
能行蒜芥  
水紅花  
英白鳳  
龍骨花  
蒼木金  
叶並水  
付痛  
痰涎注痛症  
玉稷  
乾燒  
服神效  
川椒  
艾葉  
微炒  
白芥  
濕服

中至齒立甦灸百會七七壯氣海關元各二百壯

治痰厥

痰厥暴盛不省人事喉中如曳鋸聲急取清油多灌之即吐痰而愈又竹瀝和薑汁少許多灌之又清心元一丸調竹瀝和薑汁灌下又雞子黃三枚和童溺灌下并即甦

治食厥

食厥者多因飲食過度飲食之後或着氣惱變為異常急暴之症口不能言目不識人四肢不舉急煎薑鹽湯多灌探吐之即甦

治蛇厥

蛇厥之症心腹疔痛暴作暴止惡心嘈亂時煩嘔吐冷涎青水面色青黃口唇紫黑色變不常者是也若貫心則殺人甚急使君子肉一兩水煎服又苦練根白皮一兩濃煎調檳榔末一錢五更頭頓服凡上半日蟲頭向上前一日不食夕飯至夜半後先灸豬脯令香臭滿鼻即細嚼嚙汁隨即頓服槩蟲飢求食之時也痛時則不拘○方痛之時不宜飲食且食甘則痛復極槩蟲食甘則起食酸則醉食辛則伏食苦則止○酸石榴根皮二斤檳榔十

州  
檳榔  
濟腸  
和溫  
年冬  
煎水  
燒酒  
每服



五三系書  
枚水七升煮至二升去渣以粳米煮稀粥平朝空腹食之少間蟲並死快利○苦練根去麤皮取白皮二兩水二椀煎至一椀半去渣用晚粳米三合煮糜粥空心服○服藥殺蟲法先以炒肉一二片吃引蟲向上然後進藥粥一二口少頃又吃一二口漸漸加至一椀或二椀其蟲盡下○三蟲求食病病後腸胃空虛三蟲求食食人五臟者謂之狐惑殺人甚急上食肺係則喉門騷痒下食大腸下口則肛門騷痒令人不能堪以合歡木燃竈而坐於曲突之上使其煙入肛門又使入口卽差

治氣厥

附中氣

氣厥多生於驕貴之人因事激惱忿怒盛極不得宣泄逆氣上行忽然仆倒不省人事牙關緊急手足攣搐狀如中風但口內無涎聲爲異急用蘇合元或便香附末二錢薑湯調灌則卽蘇不可妄用雜藥

中氣與氣厥同因與人相爭暴怒氣逆而暈倒也氣脉多沉風脉多浮風中身温有痰涎氣中身冷無痰涎急用薑湯灌救○若中氣而用中風藥治之多致殺人



治中風刺芥糖  
末和酒三錢服

猝上氣肝乃大虛氣聚也喉閉其聲如鼾有如痰在喉響者此為肺絕之候宜用人蔘膏救之用薑汁竹瀝放開頻頻服之如未得蔘膏先煎獨蔘湯救之早者十全七八次則十全四五遲則十不全一

治中風

猝然昏仆不省口眼喎斜手足不遂急以手大指爪甲指刻人中皂角末吹鼻即提起頭頂髮候其噴嚏有嚏可治無嚏不可治口噤則以烏梅肉和南星細辛末頻擦牙口自開○取竹瀝三合薑汁一合調清心元一丸或龍腦蘇合元三丸灌口中或

多灌香油即甦○不省人事涎潮不得語者側柏葉一握蔥白一握并根細研如泥好酒一鍾同煎一二十沸去滓溫服○風痰壅盛者口眼喎斜不能言語者皆當吐之輕者取瓜蒂末一錢溫水調服重者取藜蘆五分入麝香半錢為末薑汁調服如不吐再服之○用白礬二錢生研作末生薑自然汁調和開口灌下其涎或吐或化下便醒○口眼喎斜向左則石灰水調即於右邊塗之向右則左邊塗之候其方正如舊即以水洗下大效○身如角弓反張四肢不收煩亂欲死者清酒五升雞



痢症吐衄數  
入白沸湯取汁  
極渴引飲時  
多飲○人乳煎  
草姜服神效  
○黃花地丁搗  
取自然汁煎  
加蜜服之  
常治車阿魏  
丸之白沸湯  
下

白矢一升搗篩和合揚之千遍乃飲之壯者服一  
升日三度弱者服五合差○灸足大脂橫紋隨年  
壯立愈

治中暑

夏月在道中中暑厥者及昏冒痰厥吐瀉喘滿大渴  
汗出頭疼煩燥欲死者急扶在陰涼處取道中熟  
塵土積心上及臍上作窩令人尿其中即活○以  
布巾衣物蘸熱湯熨臍中及氣海續以熱湯淋布  
上令暖徹臍腹如倉卒無湯搦途上熱土積於臍  
上冷則易之○以新汲水滴兩鼻孔以扇扇之重

夏秋之交  
澤春酸少便  
難滋氣可  
厚等症神曲  
五姜木通一搗  
漂煎連服

者地漿灌之即醒若與冷水飲即死○生薑一大  
塊或大蒜一大瓣水研灌之○童便或清醬和水  
灌之又生馬通絞汁灌之蓼葉香薷煎灌又石膏  
一兩煮取汁灌之即差○取大蒜一握路上日曝  
土雜研以新汲水和之瀝去滓灌之藥到腹中即  
甦此神人備急方也○使人噓其心令煖易人爲  
之○槐花軟筍濃煎服即效後不復發○真末調  
冷水服蜜水亦可○如驚悸妄言辰砂益元散并  
水調下

治中寒



神契靈樞  
香附子三錢  
蒼朮一錢半  
甘草一錢  
甲巳生乳香  
乙庚生乳香  
丙辛生乳香  
丁壬生乳香  
戊癸生乳香  
一錢入

傷寒有即病有不即病以漸而深中寒則其病即發而暴暈倒口噤四肢強直拘急嘔吐涎沫脉浮緊或微或無若不急治或在朝夕急昇置煖室以手炙火摩病人胸腹間取熱酒薑汁各半盞灌下兼用蔥白二三升分二包炒令極熱互熨臍上冷則用水拌濕更炒熨之○冷極唇青厥逆無脉陰囊縮者急用蔥白連根切小麥麩各三升鹽二升以水和勻炒熨臍上如上法又灸臍中與氣海關元各三五十壯一云氣海關元各灸二三百壯而脉不出手足不溫者死

治霍亂

女入少極加  
入未甚以一錢  
右葶干三錢二  
葱白五七寸  
以三貼在臍  
時有在方云

增寒壯熱頭痛眩暈心痛腹痛不可忍不得吐瀉謂之乾霍亂吐瀉不止謂之濕霍亂也乾者以吐瀉為主鹽一兩生薑切半兩同炒色變以童尿二盞同煎至一盞分二次服吐下即愈又鹽一大匙熬黃取童尿一升溫和攪服又鹽湯一碗入皂角末少許調服探吐又百沸湯和新汲水服之能吐宿食惡毒之物和鹽服之尤妙又鹿皮或獐皮熏煙最多黃色者水浸揉取汁頓服即吐又飲醋一二升吐下○多飲冷水蜜水吐下為佳若痛不止再



服再吐立效○濕霍亂吐瀉不止者香薷林檎青  
者皆可煎服又鍋底墨二錢百沸湯一盞投其中  
急攪服吐瀉立止又生薑五兩切牛屎一升同煎  
取汁服即效○牛馬屎絞汁服一杯或炒熟綿裹  
着小腹○吐瀉過多四肢逆冷不省人事南星末  
三錢棗三枚薑五片同煎極熱服一服可效或半  
夏末薑汁點服或白礬末一錢沸湯點服亦效又  
藿香陳皮各五錢水煎溫服○霍亂吐瀉之時切  
勿與穀食雖米湯粟粥入胃立死必待吐瀉止過  
半日飢甚方可與稀粥以漸而將息○霍亂轉筋

吐瀉過多遍體轉筋手足厥冷氣欲絕者急取香  
薷暑霍不或木瓜枝葉亦可或秫葛葉治轉筋筋攣搖  
可忍者或蘆花煎服又取蓼一把濃煎乘熱熏洗因  
服一二盞○一法男子以手挽其陰牽之女子則  
挽其乳近兩傍牽之此千金方妙法也○關衝穴  
鍼刺出血即差穴在無名指外邊去爪甲角○轉  
筋欲絕以鹽填臍中灼艾不計壯數立效霍亂已  
死而胸中有煖氣者依此灸之亦甦

治攪腸沙

此證心腹絞痛冷汗出脹悶欲絕俗謂之攪腸沙與



乾霍亂同或如傷寒頭痛嘔惡渾身壯熱手足指  
末微厥或腹痛悶亂須臾不救由山嵐瘴氣或因  
飢飽失時陰陽暴亂而致也先濃煎艾湯試之如  
吐卽是也蠶退紙燒爲末熱酒調服立效又多飲  
鹽湯吐之亦愈又法以鍼刺其手指背近爪甲半  
分許血出卽安先自兩臂按摩下其惡血令聚指  
頭刺之又法以手蘸溫水於病者膝內打拍有紫  
黑點處以鍼刺去惡血卽愈又法兩臂腕中有筋  
必致黑色用砂鍼擊刺出紫黑血痛卽止○近海  
之地有一急病症似霍亂土人名之曰殺腹痛不

急治則能殺人其治法以絛緊縛兩臂中節之上  
下則青黑脉突起於尺澤近處而或兩臂皆出或  
只出一臂隨其突起以針刺之出血如射其病卽  
止百不失一沙與殺音相近臂腕出血之法又與  
之同所謂殺腹痛似是攪腸沙也

### 治疝痛

小腹痛不得大小便名曰疝疔痛自臍下上衝名曰  
奔豚○凡疝痛上連胸脅甚則外腎縮入咬牙反  
張冷汗如洗須臾不救取川烏梔子仁并炒各二  
錢酒水各半盞同煎入鹽一撮或加薑服立效又沙

凡疝痛蓋法  
米東壁黃土炒  
過炭爲膏服  
淋疾多食桐子



子...  
麥或桂心或橘核或蔥白或玄胡索或牛陰莖或  
末服或湯服即差沙參常服至妙○貂皮或貂鼠四足燒  
灰酒調服青鼠足黃獾足亦好又茴香莖葉搗取汁熱酒各  
一合調服即差又蜘蛛散蜘蛛十四枚熬肉桂五錢為末大人一錢小兒五分空心酒下或蜜丸服之甚妙○炒鹽熨痛處○灸獨陰在足中指節下橫文一云在足大指次指下○千年瓦三  
七介碎作夾子大列置臍下至橫骨上灸之以陰  
囊出汗為限○小兒胎疝偏墜囊縫後十字紋上  
灸三七春灸夏差夏灸冬差又癩疝鉸針取畢囊  
中水液或穢液即愈靈樞真訣也

治吐血

吐血危重者百草霜末三錢井水調服即止又蒲黃  
炒三錢冷水調服又松煙墨濃磨汁飲之又韭菜  
汁飲之又生地黃生藕生梨搗取汁磨墨徐徐服  
之即止○藍葉汁服之

治衄血

衄血不止者百草霜末三錢水調服又吹鼻中又萱  
草根汁一盞生薑汁半盞相和細呷又亂髮灰水  
調一錢服更吹鼻中一方病人頭髮灰吹鼻中又人中白火煨  
入麝香少許研酒調服更吹鼻中○生地黃三五

治血崩當飲酒  
荆芥二兩酒一鍾  
水一鍾煎服



斤搗汁連服以泮塞鼻中又蘿菹取汁和酒飲之  
○糯米炒黃爲末二錢新水調服卽止○棗肉以  
病人涎調付血不出邊又牛膝車前葉根汁和蜜  
服○以井水濕紙帖頂心上如左鼻衄以線扎左  
手中指右鼻衄扎右手手中指兩鼻衄兩指俱扎卽  
止又以大白紙一張作十數摺浸水令濕置頂中  
以熨斗熨之至二三重紙乾立止勿令病人知以  
井華水忽然猛噴其面卽止○大口魚皮蘸水令  
濕塞鼻中亦止

### 治船暈

乘船大吐瀉頭旋眼花支體厥冷欲死急取枯白礬  
末一錢百沸湯點服無則鹽一匙醋一盞同煎服  
或鹽梅酸醎皆可煮服○暈者渴飲水卽死飲童  
溺最好自己尿亦好

### 治狐魅

着狐狸精恍惚走巡山野謂之狐魅取狐肝炙爲末  
水服一錢日三又取腸肚作羹臠食之又鷹肉食  
之腎及爪燒灰末和水服又取狐狸皮鼻端黑處  
爲末酒調服並效

### 辟瘟疫



務成子螢火丸雄黃雌黃本草曰精明者為雌黃入

山之陰者為雌亦如雞冠明澈者佳各二兩螢火鬼箭羽蒺藜子白

礬燒各一兩羚羊角銀竈灰鐵槌柄取入各二兩

半右為末以雞子黃并雄雞冠血一具和之如杏

仁大縫三角絳囊盛五丸帶左臂上又可掛於戶

上辟瘟疫惡氣百鬼虎狼蛇虺蜂蠆諸毒及白刃

盜賊凶害昔劉子南得此方後與虜戰敗被圍矢

至于南馬數尺皆墮地虜以為神人解圍而去○

太乙流金散雄黃一兩半羚羊角雌黃礬石鬼箭

羽各七錢半右為麤末三角絳囊盛一兩帶心前

并掛戶上又青布裹少許中庭炒之大辟瘟疫○

七物虎頭元虎頭骨朱砂雄黃各一兩半蕪蕒皂

莢鬼曰都似天南星不可辨但各一兩右為末熔

蠟和丸彈子大以紅絹袋盛一丸繫男左女右臂

上又懸屋四角如值近境疫作晦望夜半當戶燒

一丸晨起各人吞下小豆大一丸則不致傳染○

老君神明散川烏炮四兩附子炮白朮各二兩桔

梗細辛各一兩右為麤末絳絹袋盛帶之一里人

皆無病○蘇合香元每取大丸浸一瓶清酒中時

時飲之最辟鬼疫之氣又縫囊盛三丸當心帶之



亦好○屠蘇飲白朮一兩八錢大黃川椒桔梗桂  
心各一兩半虎杖根一兩二錢川烏六錢剉盛絳  
囊十二月晦日中浸井元日早曉取出入二瓶清  
酒中煎數沸東向飲一杯從少至老服之三朝以  
其滓還沉井中一人飲之一家無疫一家飲之一  
鄉無疫○宣聖辟瘟丹臘月廿四日平朝取井華  
水盛淨器量人口多少浸乳香至歲朝五更湯令  
溫從少至老每人一小塊飲水一二呷嚥下則一  
年不患時疫○側栢東向葉採取乾正細末或湯  
或酒調服○神聖辟瘟丹蒼朮二兩羌活獨活白

芷香附子大黃月松三乃子赤箭雄黃各一兩右  
爲末麴糊和丸彈子大黃丹爲衣晒乾正朝早晨  
焚一炷○蒼朮燒之辟疫氣乾牛糞燒之亦佳○  
除夜爆竹中庭則辟瘟○端午日以艾爲人懸門  
上○入瘟家以紙撚蘸香油并雄黃朱砂末探入  
耳鼻內最能辟穢毒之氣○入疫家先令開啓門  
戶以大鍋盛水二斗置堂中心取蘇合元二十九  
煎之其香能散疫氣病者各飲一器後醫者乃入  
診視不相染○入疫家行動從容左位而入男子  
病穢氣出於口女子病穢氣出於陰戶其相對坐



治嗽香椒去  
核薄切任細  
片以清酒同研  
入砂礮內煨令  
爛然自置昏  
至五更為度  
用麝香白芷  
睡中喚起可也  
批服甚效  
又白南星藥

立之間必須識其向背既出而以紙撚探鼻中噴  
嚏為佳○嚏法皂莢炙去皮作末每取少許吹入  
鼻孔中令嚏半夏末亦佳如無此藥以紙撚探鼻  
嚏之

治咳逆

傷寒及久病得咳逆皆為惡候取半夏五錢生薑二  
錢細剉水煎服即止○蘇合元三丸生薑柿蒂煎  
湯調服即止○皂角末吹鼻得嚏而止又作又嚏  
凡百餘次遂止又硫黃二錢乳香一錢末酒煎急  
令病人嗅其熱氣即止○刮取春杵頭細糠吞之

條寸折納鍋  
中用米五碗  
煮至一碗湯  
飲之  
糯米一斗糖即  
三十斤不去皮  
生薑二升相  
搗入作酒浸  
七日去渣  
炒飯

即效

治猝噎

猝噎食不下刮取春杵頭細糠吞之即效

治猝失音

失音不能言杏仁桂心各一两末蜜丸櫻桃大綿裹  
含化嚥之又橘皮濃煎湯頻服苦竹葉濃煎飲之  
又荆芥蘇葉濃煎服之立效

治失欠脫頷

因呵欠牙車蹉跌口不能開合漿水不入以致不救  
取酒灌之令大醉睡中吹皂角末入鼻令嚏即自



止又鹽梅肉二箇擦牙即開又南星末薑汁調付  
以帛縛合一宿自愈又法令一人抱定病人頭一  
人以手指牽其頤以漸推之復入矣當疾出其指  
恐咬傷○黃蠟照火作片乘熱貼付緩邊限差

### 治眼睛突出

眼睛無故突出一二寸以新汲水灌漬睛中數易水  
睛自入仍以麥門冬桑白皮山梔仁各一錢水煎  
服之○眼睛垂出至鼻如角黑色痛不可忍或時  
時大便出血名肝脹羌活煎服愈○眼睛被撞打  
突出若眼系未斷即推入胞內於四畔以生地黃

細搗厚付不令風侵若內有瘀血鍼刺出之自愈

### 治蠶唇

口唇緊小不能開合飲食不得不急治則死此亦奇  
病名曰蠶唇急用薏苡仁湯薏苡仁防已赤小豆  
炒甘草炙各一錢半兼用黃栢二兩以五倍子密  
陀僧各二錢甘草二分爲末水調塗黃栢上炙乾  
再塗再炙藥盡爲度然後將黃栢作薄片臨卧貼  
蠶唇上天明即愈又白布作燈炷如指大安芥刃  
上燃炷令汗出拭取付唇上日二三度故青布亦  
佳猪脂調付尤佳又用青皮燒灰猪脂調搽唇上

治喉痺乳蛾  
用椒膜衣風  
尾草插細入  
其毒梅肉末  
酒多許研細  
和再研細布  
候汁心親毛  
刷盡至玉漆  
身消



毒腫始生鼠皮  
年久者以皮邊  
限腫暈塗  
涎付新皮  
或菜豆醬  
連塗至近國之

膝下腫處久  
不乾濃汁者  
松皮細末和  
油塗之俗稱  
全田共

仍將青皮灰末每一錢酒調服之又蛇蛻皮或鱗  
糟燒為灰猪脂調傳

治唇腫

唇腫生鼠剖腹去腸腑和血付之雖毒腫無不即差  
○六月採乾笠耳浸水取汁以雞羽頻塗即效

治腦背腫

凡癰疽發腦發背至險必死宜用酒洗大黃及甘草  
每三錢煎服○忍冬花與葉生搗煖酒調服又槐  
花四兩炒入酒二碗煎服○麻油一斤煎十餘沸  
候冷入好酒二碗和勻分五次一日夜盡服○薺

連珠瘡鷄  
卵一箇作穴  
入皮麻子  
後只食鷄  
卵地三十日  
牛骨入鉢  
火盡和後  
用青燻厚  
塗瘡處  
殺虫  
乳腫腫苦  
一兩許在  
黃花金銀  
五支煎後  
溫付兩州  
乳腫成膿吞  
木綿窠一箇  
即自瘻

荔葉爛搗研絞取汁和蜜飲之數次洋付瘡上下  
利即愈○腫發背欲死雞腸草搗付又伏龍肝末  
酒調厚付頻易○背腫以麤黃色石如鵝卵者猛  
火燒令赤醇醋中投入自有石屑落醋裏頻燒至  
石盡取屑晒乾為末醋調塗之○腫毒所及處以  
狗膽墨汁和於蒜根汁圍塗之愈頻愈好待其毒  
暈少挫漸次進塗以至腫頭之傍毒氣會腫頭成  
膿破腫後付粘米飯最善吸膿榆根皮搗付亦好  
○腦後髮際腫取栢枝如指大者橫研作馬蹄形  
插於慢火灰中乘熱點烙腫處以差為度○腦腫



面腫滄好清醬  
取年久井骨溫  
壓之  
凡有腫立息  
土蓮生汁塗  
腫淡

初發時以無沙黃土和水造罐如煎膠陶罐而通  
其底安於腫處滿盛地龍又以土作蓋而亂鑿衆  
孔置於地龍之上用艾大炷四五列於蓋上而灸  
之俟其地龍盡消更納更灸連日不輟則腫自消  
○灸法凡癰疽生於腦背初如粟米大或痛或痒  
因作赤色人皆慢忽不為治不過十日而歿但於  
瘡上灸二三百壯無不愈但早覺早灸為佳始發  
一二日十灸十活三四日五六活五六日三四活  
七日則不可灸惟頭為諸陽所聚艾炷宜小而少  
灸之○腫初發不知瘡頭以濕紙付其上先乾處

是也

治疗腫

疔瘡初發突起如釘蓋故謂之疔生黃疱中或紫黑  
色初發必先痒後痛先寒後熱四肢沉重頭痛心  
驚眼花若火重則嘔逆多因食自歿牛馬禽獸肉  
而發殺人於一二日之內發在手足頭面胸背骨  
節間者最急其餘處為緩又有紅絲疔魚臍疔其  
毒尤甚○治法取蟾酥菜豆許置舌上仰卧取汁  
嚥下又鍼刺疔心納一丸於中紙貼護之神效又  
蜚螳取心下肉貼疔上半日易新者又斑猫一箇

惡瘡腫毒  
初起皆由  
朽肉流注  
生疔毒  
疔之四面自  
然消毒切不  
可併疔頭  
付之  
治走馬疔尾  
疔子比附子  
毒不用未經  
毒藥去毒  
煨燒存性  
冷地為末



瘰癧又馬蹄  
檢灰八錢付  
之  
治小腸疝氣  
肩葉六錢天  
門冬五錢水  
煎服  
治小便不通  
一錢細末以  
龍眼肉包之  
嚼嚥下立效  
痔疾不綿子  
乳香黃柏茶  
煮中洗洗木  
綿子任和  
諸瘡付之

捻破以付疔上封之又蒼耳莖葉燒灰醋塗之又  
白狗糞和水絞汁服滓付疔上又馬齒莧搗和頭  
垢封疔上並神效○疔初發時牛蒡子吞一粒其  
頭即出以真末作餅孔之用黃蠟鎔點又白礬熔  
化少許入鹽水浸之一晝夜即解煮一云礬入鹽水  
沸浸之限  
差又生大豆一握嚼和涎塗之手足疔妙○取桑  
枝如指大者橫研作馬蹄形挿於慢火灰中乘熟  
點烙疔處以差為度○疔毒危重將死取土蜂巢  
一箇蛇蛻全者一條盛器中黃泥固濟火煨存性  
為末每一錢空心好酒調服少頃腹中大痛痛止

而其疔已化為黃水矣又甘菊葉甘一無  
字擣取汁飲  
一升又取莖葉擣付疔上即愈並神效一云冬用  
根垂死亦  
效

紅絲疔急鍼其絲出血取白荳汁滴孔中妙

魚臍疔取絲瓜葉連根蔥韭葉爛搗取汁和酒服以

滓隨瘡左右貼腋下或胯下即安又蛇蛻燒灰雞

子調付瘡上

吸疔毒法取大蜘蛛一箇放瘡上自啞其毒連易三

五箇其毒自敗如蜘蛛困則沉水中以活之為妙

又取蚯蚓八九條搗酒濾飲之滓貼四圍留頂出



疥瘡狼毒  
地榆作末和  
真油塗之  
處神效  
唐瘡藥木  
燒北煨空穴  
房中烟氣油  
於腫處久而  
眩昏則止又  
為之松木位  
夜油塗之勿洗  
要事

毒氣○灸法大蒜搗爛塗疔四圍留疔頂以艾灸  
百壯以爆為效不爆難愈

手指忽腫痛不已地榆煮作湯漬之半日愈又黃泥  
水調塗指周匝厚一寸許納熱灰中煨之令燥視  
皮皺即愈○凡毒腫初發土蜂窠上細土醋和為  
泥付之柳葉若皮入鹽少許煮洗之○人鬚燒付  
之又鹽湯溫洗日三次如已成膿白丁香塗之立  
潰

治癰疹

清心元月經水調下極妙又近火使身體溫暖即消

寒薄者最得○樺皮水煎服之又益母草水煎服  
之並有效○石灰和醋塗之○黑紅兩色癰疹雞  
子黃赤豆荊芥搗勻塗付

痘瘡經驗方

謹避風寒切禁生冷終始宜守此戒○忌一切香臭  
惡臭凡燒煮油炒煙臭滅燈燭臭燒髮毛羽去糞  
穢通溝渠惡臭又忌房中淫慾梳頭巫覡僧尼外  
人切勿出入要令內外安靜○禁忌食物生梨紅  
柿西瓜大棗乾柿沉柿柑子橘柚一切酸鹹寒冷  
等物○凡痘熱盛故自不思魚肉而巫以為僧神

治痘毒上攻  
四障乾一  
具淨洗煨燥  
天花粉等分  
細末取羊肝  
入其中以麻皮  
傳煎泔水煮  
熟切食肝



治痘色黑唇  
口冰冷狗蠅七  
枚搗碎和酒  
小許服即紅  
潤冬月狗蠅  
藏狗耳中  
洋黑陷沉者  
乳香檀香不  
拘多不效火盆  
內焚之托兒  
烟熏上即起  
小兒耳後生毒  
瘡痛也地骨  
皮為車熟湯  
洗或油香調  
付

舉家素食甚者病兒雖索魚肉巫曰神故欲戲之  
惶恐不敢與喫使氣血益虛而變症雜出以至難  
救痘家所宜深戒也

初熱三日初覺有痛勿論傷寒痘疾急用升麻葛根  
湯葛根二錢白芍藥升麻甘草各一錢加入荆芥  
穗鼠粘子炒山楂肉各七分○小兒不肯服藥用  
金銀花或忍冬茶以發汗為度而終不如湯藥也  
○此時或發驚搐室塞目竄切不把持任其搐搦  
急用牛黃抱龍丸或抱龍丸甘草薄荷等分煎水  
調下瀉青丸亦妙○此時或吐或瀉或吐瀉并作

○紅疫法  
重者痢疾用  
燒酒凡發症  
最難除者則  
取紅花三指搗  
幼兒則二指搗  
炒黃心草酒  
煮去浮溫也  
消腫時執不  
止則皮襖及乾  
程老土中白  
地黃生牛黃  
中白三坊和丸  
二層用口中  
白茅根一握

自此至出痘終日症雖苦劇皆不妨○此時若腰  
痛將必黑陷急急用神解湯柴胡一錢半乾葛防  
風各一錢麻黃升麻白茯苓各八分甘草五分煎  
服後溫覆出汗而不汗再服以痛止為度若無藥  
則只宜多汗而能食者免黑陷○此時或發渴切  
勿與冷水或金銀花茶或糯米煎水或三豆飲皆  
可飲又紅花子煎水亦妙

出痘三日始痛一日即發者極重二日發者亦重三  
日發者例也或游戲四五六七日乃出者勿藥之  
類也○此時吐瀉不足憂也○初見紅點急用化



中惡者口辛  
吞下神效  
○初痛時發癩  
及消癩有汗  
氣莫如升麻  
為松以道松  
三五升存三  
白芍藥一錢半  
甘草一錢半  
升麻洗過起  
多一錢葱白七  
分連根和皮  
煎以心溫湯  
神效者癩者  
後身及神和  
也升麻去目炒  
半粒烏梅七分  
碎葱白忍冬

黃土水煎石中  
煎去小許調也  
似食者者清  
甘味秀豆者  
此升麻者每  
月經來時  
疾取細葉枝  
去支長一握  
團一握者七  
以升三七於此  
三升也也

毒湯紫草茸升麻甘草各一錢加白芍藥一錢山  
查肉七分蟬殼去頭足翅五分糯米百粒煎服限  
三日日再服則能令痘稀且無痘後諸症痘疫初  
程之聖藥也○此時又急用乾麩脂調於白蜜頻  
頻塗眼眶口唇鼻孔耳中以防痘出砂鉢麩脂和  
朱砂用亦有少效○此時痘出太多毒盛急用連  
翹升麻湯即升麻葛根湯加連翹一錢者也○此時急用鼠粘子  
作末井水調付兒顛門以防眼患○此時或發驚  
搐室塞此則逆症也急用加減紅綿湯麻黃去節  
全蠲去毒荆芥穗紫草茸蟬殼各五分蔥白一莖

煎服○此時腹痛者痘自腸胃出故也用蟬退湯  
蟬殼十箇甘草一錢半煎服或為末白湯調下即  
效○此時或大渴求飲不已紅花子一合水煎服  
或菜豆赤豆黑小豆各一合烏梅三箇水煎服渴  
自止月經亦宜用○取月經法糯米一握井水四  
大碗煎至半候冷濃洗月經渴時連續用之蓋糯  
米治痘毒養胃氣止泄瀉雖用十盆終無泄瀉之  
憂○此時或有四肢百節皆痛者此由痘未快出  
或由未盡和解而然勿藥自愈○此時可以觀形  
色下虛實用藥○出痘終日自初出第三日此時或有痒



症以木麥末糝於痒處以手揩摩卽止若木麥末  
不效用敗草散勿論郊草穀草多年蓋屋受  
日月霜露風雨極腐爛者也末糝  
之以手揩摩卽效凡痘或爪破或潰爛流血流汁  
處皆可糝之○止痒莫如水楊取溪邊大葉赤枝  
之楊剉之大旱不斷之長流水猛煮六七沸乘其  
水極熱以紬巾頻頻淋洗面部而久洗方有效故  
必以兩器遞易温之日夜數十次多多益好此藥  
能引出毒氣故頂陷者皆起如或黑陷處則綿絮  
量其大小廣狹而裁之漬此水乘熱遞付焦黑者  
皆濕爛毒不入裏如倒靨之類尤見奇效外治之

藥無過於此自此至落痂連日夜洗之但冬月浴  
之恐觸風寒只洗面上可也春夏用葉秋冬用枝

寶鑑曰春冬用枝夏秋  
用葉水一金入楊五斤○此時必有咽痛連用猪

尾膏未泄精小雄猪尾尖以利刀裂取血和龍如  
腦作丸小豆大溫淡湯下或紫草煎水下如

聖飲麥門冬桔梗各一錢鼠粘子甘草各五分竹  
葉三片如其毒盛用加味犀角消毒飲鼠粘子炒  
研二錢防風升麻各七分荆芥穗麥門冬桔梗各  
五分犀角屑五分臨服調下或煎服之亦得四貼  
日再服

起脹三日自出痘  
第四日痘順者已自昨始有脹意先出者



先起以次漸起凡痘之虛實毒之淺深全在此間  
若痘密勢重急用神功散數貼以救之黃芪人蔘  
白芍藥紫草生地黃牛蒡子紅花各等分前胡甘  
草減半若症險用神功散數貼連用內托散黃芪  
蜜炙人蔘當歸川芎厚朴薑炒防風桔梗白芷甘  
草各一錢木香官桂各三分若淡白灰黑陷伏更  
加丁香五粒○此時因頓委憊啼號不安者例也  
○此時若煩渴用紅花子湯或烏梅湯方見上若  
咽痛不可忍口舌生瘡不能吮乳用加味犀角消  
毒飲方見上加芩連並炒連翹各七分極妙若不起

脹虛者用保元湯人蔘二錢黃芪甘草各一錢加  
當歸白茯苓白芍藥微炒各一錢肉桂五分生薑  
一片糯米百粒○此時若泄瀉則大危急用保元  
湯加白芍藥微炒白茯苓白朮乾薑炒黑肉桂各  
七分犀角屑五分○此時痘全白者由氣虛也用  
保元湯加當歸白茯苓白芍藥酒炒各一錢官桂  
七分生薑一片糯米百粒數貼以紅活爲度痘色  
紅紫者用保元湯加木香當歸川芎各七分痘色  
太紅近紫者由血虛也用四物湯生乾地黃酒炒  
白芍藥炒當歸川芎各一錢加黃芩酒炒紫草紅



花各七分○此時若痛甚不可忍則白芍藥細末  
每一錢淡酒調下以黃土細末糝於痛處○此時  
發痒考上出痘終日條用藥○此時水楊湯日夜  
頻頻淋洗面部可也

貫膿三日

自出痘至六七日

凡痘順者第六日顆色白已有

向膿之漸七日則面部浮氣益加此例症也八日  
浮氣稍減亦能開眼咽痛亦少愈○此時或吐或  
瀉或吐瀉大危也急用定中湯取真正黃土一塊  
置碗內以百沸湯泡之以蓋合候冷右用兩酒盞  
和水飛朱砂末五分水飛雄黃末一錢少加砂糖

溫服○此時宜以銀鍼刺之橫貫痘顆則汁自流  
出極妙無銀鍼則竹鍼亦好○此時必發痒頻以  
水楊湯點之或有痒甚爪破者後必癢痕以細巾  
裹手指就其痒處按之甚緊則或有顆粒自破汁  
出亦不妨○此時熱候必盛連用月經間以猪尾  
膏以降熱熱極者多用以胸中爽然為度不然熱  
自入內終至危境慎之慎之

收靨三日

自出痘至九日十日而稍稍焦黑成痂時也

此時必有大熱或

引飲異常預備糯米飲月經者尾膏藥隨量痛飲  
以胸中爽然為度症輕者或不生熱然發熱者十



常八九矣○此時必有臂脚手足之痛蓋面部既已成靨故手足方欲脹膿浮氣益加之致死非別症此則不必憂也○此時或有白睛上紅絲散漫中有凸出之狀者痘出而然也仍爲翳目犯黑睛而成白點氣血既復之後雖有勿藥之喜而豈可信其自愈而不急治乎惡實作細末和井華水作餅貼付顙門上日再易妙○此時有泄瀉或赤白痢者皆瀉熱而發也數日後自差不必用藥如氣血俱虛熱乘其隙而發者日將加重終至難治急用保元湯加白芍藥微炒白茯苓白朮土炒各一

錢肉豆蔻肉桂黃連酒炒乾薑炒黑各七分連用數貼○此時手足臂脚所出之痘方始肥脹鍼刺出汁可也法見貫膿條○此時有腹痛者用蟬退湯上方見而此不效用木香理中湯木香人蔘白朮乾薑炮甘草炙各五分加鼠粘子炒研黃連酒炒各五分○此時胸膈之痛在中脘近處者餘毒歸心然也急用乳香二錢水一盞煎服只有脅痛者由瘀血而作韭菜取汁用之可也○此特觸風寒而胸腹急痛者候似癰亂若以癰亂治之則必致大危急用消風散荆芥穗甘草各一錢人蔘白茯



苓白殭蠶川芎防風藿香蟬退去頭足翅羌活各五分陳皮厚朴製各三分加柴胡七分行皮各五分入細茶一撮煎服三四貼即效○此時有手足戰掉或頤戰氣虛致然也宜用保元湯加當歸白芍藥酒炒白茯苓各一錢肉桂七分○此時瘡處濕爛不斂治法上同而更加白朮土炒一錢以差爲度○此時有陰囊浮大年長者大如瓠瓜小兒則大如鵝卵痘毒與濕熱下注而然也急用消毒飲鼠粘子炒研二錢荆芥一錢防風甘草各五分加黃芩酒炒生地黃酒洗知母草龍膽各五分數

貼甚效然此症勿藥自愈者多○此時有吐瀉并作者宜用定中湯方見上虛嘔者亦效○此時耽睡呼之不應勸其乳食甚不肯喫病弛氣困而然也宜用保元湯加白芍藥酒炒當歸身白茯苓鼠粘子炒研各一錢肉桂七分薑一片糯米百粒同煎服之氣短耽睡者亦用右藥而難救者甚多○此時諸症難名若氣短氣虛若嘔泄若昏睡若不省若奄奄垂盡敗症俱見者宜用四聖回天湯人蔘黃芪當歸身各二錢石雄黃水飛末二錢神服時調下如或黑陷加白朮二錢以差爲度極妙此藥



卽全有亨之所製也別無的指之症而形勢則極危試用此藥頗有回生者蓋參芪補氣當補血雄黃寧脾胃治瘡毒故也○此時謔語見鬼者熱也昏昏不省者亦熱也月經猪尾膏等藥連續用之可也若症危惡似不能救者則治法同黑睛○此時眼有赤白翳者可以急治而氣血未復之前輕用泄藥非徒無益於眼患或有關於死生必須完復之後方可藥治而又或自愈者有之○反眼之症必多於收靨之時而其爲形也上睫之毛必倒豎或直豎向前所見異常或上睫之內有紅肉

垂下有此症者恟怛不省或狂言見鬼蓋形症古方之所不論而眼胞屬脾胃想必餘熱入脾胃故也自作方文名之曰連翹石膏湯連翹石膏研甘草煎水飛各一錢半葛根生地黃山梔各七分升麻赤茯苓赤芍藥各五分甘草三分加黃芩酒炒黃連酒炒各七分急用之輕者二貼重者三貼用輒神效十無一失○此後諸症或泄瀉嘔吐或眼患皆已略論於上各以其藥治之可也



司準禦侮將軍行忠武衛副司果張又郁

禦侮將軍行忠武衛副司果張道行

宣略將軍行忠武衛副司勇高時俊

宣略將軍行忠武衛副司勇全壽明

宣略將軍行忠武衛副司勇趙光益全校



新書卷之十五終





